



皇明嘉隆間見紀卷之九

壬子嘉靖三十一年

四十一
城

嘉靖三十一年

春正月甲申朔 上不御殿○丙戌金星晝見至甲午日始沒○虜

大同塞先是虜叩市大同巡按御史李逢時謂詔禁非時開市叱去逮

諸通事于獄至是俺答遂縱賊入掠一犯雙溝鶯李寨叅將尚表守備

劉勳禦之皆敗再犯圍山墩諸處遊擊李桂等棄其軍逃警報沓至逢

時因上言虜寇敢於歲初擁衆入犯俺答之約束全無馬市之羈縻難

恃今日之計惟大集兵馬一意討伐乃帝王威恩並施之道宜行宣大

薊遼各總督鎮巡督令將士合兵征勦仍勅京營大將咸寧侯仇鸞發

兵進征毋得隱忍顧忌致成大患 上曰虜賊非時擾攘官兵不能防

禦唯平日專恃馬市全不隄防故爾自今一意戰守毋得仍前觀望○

命遼東苑馬寺卿張思移駐本苑兼轄金復蓋州三衛軍民初苑馬卿

原設于遼陽去本苑三百里遼東守臣以三衛民繁事多開原兵備不便遙制乃奏請以思兼之○東安縣大水詔令蠲糧差一年○宣府撫臣劉壘議請開市許之時宣府邊外虜數叩闕求市壘因上言大同互市寇盜不作而宣府晏然今乘其效順之機撫之易耳請無拘臣以一年兩次之期令絡驛開市羈縻虜情於國計甚便兵部尚書趙錦言壘議可行第銀無過五萬馬無過五千守此則雖一年數市亦當聽之報可○二月更名西苑御宮為永壽宮○宣大二鎮大饑人相食命督餉侍郎馬坤馳往賑濟之○虜入大同塞指揮王恭禦死之先是上諭兵部虜情變詐反覆不一為今日計惟有大振兵威用張殺伐庶舒華夏之氣尚書趙錦上言大將仇鸞領各邊兵入衛六萬八千天下精兵無以踰此宣大戍卒又十有一萬大振兵威用張殺伐此其時也若復觀望依違坐誤事機臣等萬死何足贖罪第鼓勇奏功以副皇上眷遇

之隆則在大將鸞所當自盡耳上曰兵馬既多即令大將分布逐勦勿誤機宜時鸞偃蹇畏懦不敢發兵征進又恃通市不為戍守而大同總兵徐仁復驕縱聲言既與虜平無庸戍守恣意賂割為囊橐計巡撫何思亦以通市故禁邊軍拒虜殺者抵死以故虜衆出入關隘無復顧忌動稱貢市有司廩餼惟謹其狡黠者變服入城奸辱婦女莫敢誰何至是虜衆萬騎入塞抵懷仁縣管家堡大掠居民總兵徐仁副總兵王懷邦叅將張騰游擊劉潭京營左擊孫麒各擁兵觀望不為逐勦潭又陰遣廝卒結虜鬻路獨中軍指揮王恭率所部禦虜戰於管家堡力屈死之虜得利遁去總督侍郎蘇祐上其事上命兵部偵虜衆多寡亟以聞○詔逮繫大同總兵官徐仁等詣京拷訊削巡撫都御史何思籍贈指揮王恭都督僉事任一子正千戶立祠祀之時代府饒陽王文蔚上言徐仁恃虜與平賂削軍餉及至有警移疾避艱劉潭勾虜通市妄

稱貢馬何思不察虛實誤聽冒犒縱虜出入醉飲鮮醇餘虜快利大肆猖獗徂于通市反禁傳報大壞邊防莫此為甚巡按山西御史李逢時亦論劾仁等而言指揮王恭素著苦節臨難致命宜錄祀贈廕以勵臣忠 上命錦衣官校械繫徐仁張騰劉潭等來京訊治何思削籍為民奪王邦懷官發宣府立功自贖王恭忠可嘉予其贈都督僉事任其子為正千戶立祠祀典禮部議行○鳳陽府地震有聲○詔修太和山玄帝宮湖廣撫按會計工費當用十萬餘命發內帑銀給之勅原任侍郎陸木提督工程○斬夷使了頭智于大同市大同自弘賜堡拒虜市後日苦侵暴累求開市無敢應者至是復遣前開市時夷使了頭智來求市通事林叢蘭故與智善乃誘入境縛之總督蘇祐以擒獲功聞斬智于大同市○大風揚塵四塞○詔罷大同馬市時邊防久廢言官屢以為言咸寧侯仇鸞亦慮禍及密疏止之乃詔罷市○詔補大同戍卒兵

部尚書趙錦等上言往歲宣大非無虜患而本鎮戍卒自足戰守自簡錢卒入衛京師眾分勢散致調各鎮士卒赴援奔命罷勞餽餉繁費數年以來費金七百餘萬後將何繼不若以本鎮軍舍餘丁士著壯夫補足原額庶供億可省而戰守足恃 上從部議○三月裕王景王冠先是禮部尚書徐階言今皇子年十有六選婚講學實維其時必先行冊立大典使名位素定而後冠婚諸禮可以次及 上令階具冠婚儀以進階復請以長幼為序先裕王次景王婚期亦然 上令俱於三月行之至是月朔乃俱行冠禮禮成 上諭輔臣曰卿等以二子當婚請今已冠矣當先舉讀習半載正合婚期列聖垂範亦是此程其示禮臣知之○福州府地震○山西地震有聲○詔大將軍咸寧侯仇鸞帥師討賊第為大言以自解云虜不足平及督重兵畏縮不能戰大學士嚴

高以 上寵信之深不可間亦欲因事以暴其敗缺故上言鸞不戰
上令兵部傳諭之自是始知鸞不足恃○以少保兼太子太保禮部尚
書翰林學士徐階為東閣大學士叅預機務仍理部事○召起原任禮
部侍郎歐陽德為禮部尚書時德方守制 上亟欲用之令服闋即赴
任○命斬定遼右衛軍餘徐打成於市初打成被擄逃回尋叛入虜至
是詐充死力其山衛指揮納兒齋勅書馬匹入貢事覺伏誅仍沒入納
兒原勅及所進馬○夏四月倭寇破黃巖縣大掠温台寧紹諸郡邑時
海禁既寬而船主土豪益連結倭賈為奸徽人王直以亡命走海上為
船主渠魁倭奴愛服之與其黨徐學毛勲徐海彭老數十人列兵近洋
築室山隈乘巨艘為水砦出入寇掠引倭奴萬餘人破黃巖縣殺掠慘
甚自舟山象山流劫温台寧紹間浙東大震○詔贈台州府知事武備
太僕寺丞時倭寇台州巡按檄暉禦之突入賊中伏發眾潰暉死之事

聞贈太僕寺丞廕子立祠賜額愍忠○詔補築宣大邊垣初總督翁萬
達建議修築宣大山西邊垣一千一百餘里烽墩三百六十三所頗稱
完固後以通市故為虜撤毀所在破缺兵部尚書趙錦請檄鎮巡官極
力修補給事中李幼滋遂上言敵壘卑小宜于垣上增築高臺營建房
廬以藏火器器械乃詔鎮巡官斟酌行之○大將軍威寧侯仇鸞襲虜
塞外敗績時偵報虜眾數千住牧威寧海側鸞利虜少欲襲有其功乃
帥各營親卒及檄戴綸等統眾萬餘夜馳二百里比曉及威寧海虜覺
悉眾突出鸞等倉皇退走殺傷官軍一百二十六人射死馬百餘足鸞
等奔還中途斬獲零騎六級上疏言狀且張其功伐兵部覆言斬獲甚
少損傷甚多難以言功且出師伐虜與倉卒禦敵不同亦不可以血戰
論 上曰斬獲雖少勤勞宜錄乃賞鸞金幣戴綸等亦賞資有差○虜
入遼東塞指揮王相死之詔贈相官及祭葬錄廕時虜酋把都兒辛愛

原謀寇錦義詞知有備乃乘虛入犯遼東前屯衛大河口撤去邊垣七十餘里指揮姚天謨等力戰潰圍不克皆死王相聞報統所部兵四百人赴之與虜遇於寺兒山大戰移時相被重創千戶葉廷瑞調團練卒百餘佐之相裹創欲復戰或曰虜克物如此爾以寡弱當之必無幸相曰吾家世為將惟有此一腔血報國恩耳明日虜欲歸相疾趨出其前邀之戰于蠟黎山虜悉眾來相殊死戰左右夾擊身復被十餘創而死廷瑞面受數刃昏仆于地次日乃甦餘卒無幾虜即日引去總督薊遼都御史何棟以聞 上嘉相忠勇贈都督同知任一千正千戶○五月詔添設兩淮浙江等處巡鹽都御史從戶部請也給事中何雲鴈言鹽法之舉廢不在官之加設與否顧所以督責之者何如耳今有巡鹽御史事權豈在都御史下而鹽法之壞至此以御史不能盡法懲奸實心興利故也宜專責御史其都御史勿設便 上不聽令吏部精擇堪任

者以聞既而以順天府丞王紳為右僉都御史清理淮浙等處鹽法○命順天府官祈雨既而大雨百官表賀○詔謫陝西兵備僉事史直臣為潞安府通判先是大學士嚴嵩與戚寧侯仇鸞競寵構隙遺直臣父道書言 上命君主馬市縛獻蕭片皆君之功鸞僕時義冒功謂何宜論劾之道具疏艸命直臣轉上會見者言此疏上嵩必用子子重圖之直臣乃中止後鸞覺以道告歸莫可罪乃奏劾直臣在工部時督造戰車不如法今皆損壞嵩亦啣直臣中止不之救遂有是謫○福建巢賊李文彪等寇南安提督軍務都御史張烜遣兵禦之於聶都嶺敗績清軍御史沈寵劾奏烜 上以劇寇未平姑下詔責督烜悉心撫勦○雲南府地震○禮科給事中王鳴疏請王府無得收置民田從之○諭賜湖廣巡撫都御史屠大山巡按御史胡宗憲等幣絹以恭刊承天府廟學碑進呈也○詔罷戶部尚書韓士英以戶部左侍郎方鈍為戶部尚

書時士英自南京兵部被召未至南京給事中張承憲御史金豪等交章論劾士英庸鄙闕茸歷任戶兵二部利權委之吏胥軍務聽于守備不宐復理劇曹 上令罷士英歸責吏部推用不當乃改用鈍○廣東風雨雷震海潮漲溢時雷州遂溪諸縣風雨驟至雷震火光如毬自西南起至中天星散海潮之溢壞官民廬舍及人畜田禾無數○虜寇薊州塞命威寧候仇鸞出禦之先是遼東報至鸞請行邊仍請以兵戶工三部侍郎從兵部主調遣戶部主糧餉工部主器械三侍郎各簡其屬皆隸鸞幕府自布科條煩碎嚴苛動以軍法爲言 上俱從之時諸司屬多難其行而虞衡郎中張祥獨抗言欲往以赴國家之急同官皆壯其有毅直之氣鸞又以朶顏三衛導虜寇邊欲乘虛搗其巢穴總督何棟以爲不可貽書力止之至是謀報虜復侵薊邊鸞當出師乃疽發于背旣而邊報愈急鸞益病劇上畜輿疾出師請免陛辭從之然而卒不

能出也○秋七月詔開軍民納馬事例○以都御史王忬巡視浙福海道時倭寇猖獗日甚廷議復設巡視重臣乃以忬提督軍務巡視兩浙兼領漳泉興福四郡以都指揮俞大猷湯克寬為浙閩叅將忬時巡撫山東聞命即日至浙度所治軍府又廢壞而浙人朶脆不勝戰所受簡書甚輕不足以督率吏士乃上疏請假事權誅賞得便宜從事且劾且撫勿拘條例從之忬乃任大猷克寬為心膂徵狼土諸兵及募溫台諸下邑築黠少年分隸諸將布列瀕海各鎮堡嚴督防禦浙人恃以無恐○宣府萬全都司地震有聲○召起原任陝西都御史張珩巡撫延綏珩諷成六年吏部薦其先任延綏甚得遠和宜赦罪復官故有是命○八月詔奪成寧侯仇鸞大將軍印鸞疽發背死時鸞疾劇不能出師猶顧恋大將軍印不欲辭上人又無敢言易大將者至是兵部尚書趙錦曰事急矣乃上言今強虜厭境人心洶洶大將乃安危所係而鸞病不

能軍印在大將所諸偏裨令不行有如虜衆長驅貽憂君父不小臣錦
不勝犬馬拳拳乞暫假大將軍印自出督師禦之 上謂本兵不可出
令收大將軍印綬上之命侍郎蔣應奎暫掌戎政擢京營遊擊將軍時
陳為都督僉事改戶部侍郎孫禮為兵部兼僉都御史俱提督軍務於
是錦即夜至鸞第收鸞印綬鸞聞收制勅印綬大恚憤疽益劇遂死○
詔裕王景王出閣講讀先是大學士掌禮部事徐階奏請二王出閣講
讀 上令擇吉舉行未幾命編修高拱檢討陳以勤為裕王府侍講景
府講官檢討孫世芳林燠至是始詔出閣○江西鄉試貢院火巡按御
史蕭端蒙因論執事諸臣罪詔下金谿知縣劉汾等六人于御史訊問
奪右叅政馬森按察使陳洙副使譚大初俸一月○追論咸寧侯仇鸞
罪戮屍籍其家先是鸞數在 上前畫策調兵禦虜卒無成效 上頗
厭之及鸞死亦心知鸞奸逆未發會鸞所養時義及侯榮姚江皆冒功

授錦衣指揮等官知鸞死事必敗而大學士嚴嵩與錦衣都督陸炳亦
素忌鸞乃給時義等曰汝禍在旦夕為若計惟遁虜可免義等信之遂
出奔居庸關鞏華城諸處欲叛降虜為閔吏及邏者所獲陸炳疏聞下
詔獄鞏之炳乃進發鸞前後通虜納賄諸亂政狀 上大怒令諸司會
鞏之于是法司奏鸞謀反律當追戮乃詔暴鸞罪惡剖棺戮屍斬首梟
元九邊妻子及時義侯榮姚江皆斬籍其家沒貳入官諸黨惡皆謫戍
邊下詔布告天下

謹按高進士岱論曰仇鸞以庸暴之資叨非常之寵禦寇則束手無
策亂政則驕劫橫生皇上初以專任責成之心望其有委身報主之
績而不虞其負國之至此也蓋自其擣巢無功而歸聖心已不能無
疑然猶唯其言而莫之違者亦駕馭之冀一獲之報耳使少延旦夕
之命必不免生赴市曹當時或有疑鸞反者余曰鸞不反即反無足

憂撲滅之孤豚腐鼠耳或曰何以知之余曰歷覽古奸臣反逆者其始皆憑恃寵靈建大功以懾人心乃可劫人之從奪總諸路之兵握專閫之柄而不能少遏孤軍深入之虜此其人豈能反哉其跋扈而不可嚮邇者不過竊一時之權以肆其毒耳嗚呼鸞不足責矣使國家有任事之臣朝廷何至委大權於狂監子哉國家養士二百年緩急一無所恃乃使奸宄之徒得以亂法干紀群臣何得辭其責也總督湖廣川貴兵部右侍郎張岳討叛苗龍許保吳黑苗獲之諸苗悉平初岳委石邦憲購擒許保等邦憲密遣使入寨賄令聽撫苗麻得盤吳老獍吳且逞等窺許保至龍田寨姻家吊喪誘至別寨飲酒醉而縛之預遣人報邦憲以兵取之去岳奏誅之仍嚴督捕黑苗時苗事已定惟黑苗未就擒岳乃不復用兵但令懸賞以搆之而黑苗方懲許保竄迹深山無所踪跡於是諸司會呈苗情皆不言及黑苗岳謂自苗爭以

來辛勤數年功已八九而終之以潦早塞責可乎且黑苗不捕終不了也急督之而貴州巡撫任轍等乃言不當以一首故而稽成功欲罷無捕岳以黑苗年方三十力無數人舍之不誅它日必為邊患力持不可既詢知其因捕急故深自匿岳乃故緩其令凡諸所繫親黨盡為釋去而密督諸土官索之至是庶得其匿所遣兵劉甫等陰入寨襲斬之持其首出諸苗欲掇為功奪去索賞僉事龍遂給賞百金仍令土官田興邦督索得之驗實乃賚至軍門岳始以竣事聞湖貴地方悉寧矣時嚴蒿怙權納賄以岳不通問遺深憾之人多危岳岳慨然曰吾自分已定稜稜寒骨死時只少馬革一張耳及苗平後廷議設總督撫鎮其地仍命岳為之猶以落銜任事不復其原官云○先是西陽宣慰使冉玄助劫思州事露岳以諸苗未靖舍忍未究及是苗平岳乃條上冉玄向來黨苗劫郡及謀吞保靖邑梅諸叛惡罪狀乞逮治玄陰遣人挾重賞

入京師行賂嚴嵩岳復疏訐其陰謀行賂乞下殿衛嚴行緝捕不報○
淮徐山東大水時霪雨不止河水大溢故淮徐邳及山東諸州縣皆被
水患○九月朔州馬邑地震○命豐城侯李熙總督京營戎政熙因條
上釐正戎政三事一言逆鸞賄進把總等官宜考定去留二言鸞調任
叅將不由上命宜加逮治三言鸞增置各將家丁宜查革奪 上從之
○詔建景王府於湖廣德安府 上諭工部朕二子將舉婚禮一王留
京一王封國宜行擇建之處部覆封國重典原由欽定乃命建於德安
○詔廷杖兵部侍郎蔣應奎通政使唐國相削籍先是應奎協理戎政
竄其子繼詔名於兵籍中冒首功官千戶國相以子熙敬為仇鸞家眾
冒功授百戶至是 上諭大學士嚴嵩悉改鸞所置戎政給事中凌汝
志因論劾應奎國相言狂虜跳梁士氣不振朝廷日懸金爵之賞計功
授人猶不肯用命况繼詔等乳臭小兒從帷闥執褌中奪之首功奈何

令披堅之士蒙霜霧犯白刃畢命疆場之外乎應奎國相身為大臣甘
心墜斷乞按之 上怒各廷杖之編籍為民其子令巡按收訊○虜寇
山西三關不克遁去○詔罷各邊馬市初大同馬市罷宣府以虜守約
互市不絕至是虜益驕方張家口開市畢次日即入常峪口肆掠巡按
御史蔡杓疏請宣府馬市亦宜罷 上曰各邊開市悉令禁止敢有效
逆建言者論斬兵部丞嚴示各邊一意戰守毋怠○冬十月黜謫南京
試御史王宗茂外補宗茂論劾大學士嚴嵩久叨國柄擅作威福負國
八大罪併考功郎中萬案附權納賄狀 上怒其狂妄謫宗茂平陽縣
丞○罷兵部尚書趙錦謫戍邊給事中郭鏞追論錦始附仇鸞故也諸
凡緣鸞進者奪官治罪有差○總督宣大侍郎蘇祐等出塞擊虜敗績
時社與巡撫侯鉞總兵吳瑛協謀出塞擊虜虜酋俺荅及把都兒等會
兵逆我師殺指揮劉欽等七人士卒死者無算瑛急斂眾自衛遁歸塞

言官劾論祐等寡謀喪師兵部覆言大同兵威積弱虜勢益橫今各官親冒矢石搗巢犁庭雖未獲全勝而深入力戰以寒羶裘之膽似亦可嘉宜寬其罰以作士氣 上從之仍令優恤欽等七人之家以為死事者勸○命大學士徐階解部事時禮部尚書歐陽德至京 上命仍兼翰林學士掌部事與大學士階交代○寧夏地震有聲○召起原任兵部尚書翁萬達為兵部尚書尋卒萬達揭陽人幼穎異五歲能讀書性剛介坦直南北征討多建奇功己酉召入為本兵以父喪去庚戌之變詔奪情起復時虜患方棘 上疑至之遲以問嵩嵩先以萬達至京不先入謝已啣之不為申理遂貶右侍郎竟坐廢至是復召用命未至而卒贈太子少保追謚襄毅世稱為名臣云○十一月御史喻時以邊務疏論太學士嚴嵩言諸臣平日條對不為不多討虜擒胡不為不盡而不見有成功者言豈竟不足用邊豈竟不可圖哉由大學士嚴嵩不能報

國耳夫諸臣之議邊儲議邊帥者最急嵩宜虛心直氣陳于陛前其緩費可停其冗食可省某官帑可發某軍需可理轉移以處之緩急以濟之使陛下無憂邊儲可也某才術可授督撫某驍勇可任將帥某機智可察變某訓練可服衆破資格以用之任便宜以行之使陛下無憂邊帥可也顧乃以隱忍鄙懦為熟計以依阿柔佞為蓋節欺陛下誤國事以致大患日甚一日譬之子視父母之困踣莫為出力人視天地之擘字不為動心也伏乞嚴勅責成疏入不報○詔擢狄道典史楊繼盛為諸城知縣 上思繼盛馬市疏皆驗乃自典史遷知縣俄遷南京戶部主事三日遷刑部員外郎尋改兵部武選司○給事中袁洪愈條上賑濟糧餉恤民三事一言大同數被虜患朔州諸處瘡痍尤甚宜發帑銀行鴈門紫荊二關糴粟輸賑仍請疏桑乾河以通糧運二言渤海所黃花鎮諸處芻粟露積野無倉場貯蓄無常備守支宜增置之其調度錢

糧惟委總督不必添差督餉大臣三言畿輔諸郡兵繁賦重宜掣糧後
 清驛傳蠲逋負以賑恤之戶部覆言輸粟道遠疏桑乾河恐防險固宜
 下撫臣條其利害 上是之○南京工科給事中林懋舉御史王民請
 設水兵於南京浦子口言浦子口宜設戰艦習水戰以備不虞下兵部
 議尚書屠楷覆言留都長江天塹南有新江口營統水卒以扼江洋之
 險北有浦子口營統陸卒以遏淮陽之衝至嚴也今浦子口軍不滿二
 千不能當江口之十一而水戰又非所長不若量增邏卒置之江口而
 於浦子口沿江增墩臺十座選軍二百人守之長江寇來陸兵協力拒
 戰絕其登岸之謀北岸有警水軍沿江應援斷其入江之路庶為長便
 上從部議○十二月詔選宮人 上命於京城內外并順天等八府
 選民間女八歲至十四歲者三百人入宮○詔開膠萊新河先是山東
 巡海副使王獻懋登萊之民土瘠人稀生理不足皆由舟楫不通故也

按元遺跡鑿馬壕石底以通淮安商賈建新河等八座以蓄洩水患導
 張魯白現諸河以通水道言元人功用已開其三今之用功當任其一
 至是給事中李用敬奏開膠萊新河謂新河一道在海運舊道之西乃
 元人欲開通以避海濤島嶼之險而未成者 上詔撫按詳議以行○
 朝鮮國王李峘以洪武永樂間所賜樂器弊壞奏求律管仍乞遣樂官
 赴京教習以遵聖朝禮樂之制許之○詔逮訊光祿寺少卿馬從謙謫
 戍邊從謙論劾太監杜泰乾沒內帑金巨萬泰遂誣從謙誹謗不忠俱
 令逮訊 上怒從謙誹謗發戍極邊塞以發奸免罪從謙遂死杖下○
 吏科給事中何雲鴈疏陳考察六事納之一言稽考語以防欺誤二言
 究逃官以懲不恪三言禁餽遺以警官邪四言止許奏以端士風五言
 旌異能以昭激勸六言飭法典以肅遠人吏部覆言後四事人所當言
 前二事亦可採用 上令行之○癸酉大雪百官表賀初冬深無雪命

順天府官祈雪至是得雪○諭修歲終謝典于內殿 上命禮部傳諭百官曰朕欽承天祐崇事玄修今歲眷護非常感恩莫報凡爾內外諸臣宜盡一體大義勿欺勿慢乃分命文武大臣成國公朱希忠等祭告各宮廟百官俱吉服齋潔辦事法司停刑五日

癸丑嘉靖三十二年

春正月戊寅朔日食時陰雲不見頃之大雪百官以護日故罷朝賀次日始朝服詣奉天門行禮仍上表稱賀○詔杖禮科給事中楊思忠黜之先是思忠初議孝烈皇后不得祔廟 上心啣之後以資屢擬遷不允至是科臣表賀正旦首署思忠名 上摘表中玄禧申錫語曰是何文體思忠懷欺逆理又矣令杖一百黜之餘俱奪俸○命遣刑部侍郎吳鵬往賑徐邳諸郡邑先是大學士嚴嵩等言徐邳等十七州縣連被水患飢民甚而勦劫吏不能禁恐生他變乞命戶部給發餘鹽銀兩及

徐淮等倉存留糧米選差大臣出賑故有是命○河道都御史曾鈞等疏上治河議時徐邳被水患大學士嚴嵩請將黃河下流設法疏濬令水歸故道百姓安居 上命鈞及漕運都御史連鑣作速勘處至是鈞等上言劉伶臺至赤晏廟凡八十里乃黃河下流頃為淤沙壅阻以致奔潰此其疏濬所宜最先者次則草灣老黃河口衝決安東一縣亦當急築既成之後宜築長堤磯嘴以備衝擊又三里溝新河口北舊口水高六尺若開舊口雖有沙淤之患而為患稍輕若開新口未免淹沒之虞而漕舟頗便宜將新口暫開建置閘座及將高家堰增築長隄原建新庄等閘加石修砌以遏橫流但挑築工料計用銀十三萬九百餘兩乞發淮陽許墅二閘并蕪杭抽分銀兩解用 上從之既而賑濟侍郎吳鵬上言黃河西來萬餘里匯納百川古疏九河以殺之猶莫能支今自河南以下全派經徐出清河匯淮以趨于海而無所分其流益壯其

勢益决頻年衝潰湮淤之患皆上流少分殺之故也宜於徐州上流至河南開封諸處相度舊道擇其便利者疏濬支河一二道以分殺水勢為求圖之便疏入詔如議令鵬鈞會通河南撫按勘處以聞○巡撫雲南都御史鮑象賢討元江盜那鑑獲之先是石簡罷以象賢代之象賢既至調集土漢兵七萬廣積糧運尅期進剿為必取計逆賊那鑑大懼飲藥死象賢檄百戶汪輔入城撫諭其衆命推那氏當立者衆推前土官那端從孫從仁象賢命從仁暫統其衆事聞兵部議覆從之○詔逮繫兵部武選員外郎楊繼盛廷杖之下獄論死繼盛見大學士嚴嵩擅政乃具疏齋沐上之言方今外賊惟虜內賊惟嵩未有內賊不去而外賊可平者請誅賊嵩當在勦虜之先嵩之罪惡言者衆矣第皆摘貪污之小者耳臣敢以嵩之專政誤國十大罪陳之高皇帝革中書省不設丞相而嵩偃然以丞相自居凡府部題覆必先稟命而後起稿是無丞

相之名有丞相之權壞祖宗之成法罪一權者人主馭世之具而嵩以擬旨竊弄威福用一人宥一人則曰我薦之我救之黜一人罰一人則曰此人非我所親此人得罪于我借朝廷之恩威行一己之愛惡群臣畏之甚於陛下奸皇上之大權罪二善則稱君過則稱已忠順之道今陛下行政之善嵩必令子世蕃播之于眾曰上故無此意我議而成之又刊嘉靖疏義欲使天下謂陛下所行之善盡出於彼掩君上之治功罪三陛下令嵩擬旨蓋取君逸臣勞意也嵩乃令子世蕃及諸義子趙文華群會而議機密豈不漏洩縱奸子之僭竊罪四嵩令孫嚴效忠冒兩廣奏捷功又冒瓊州一人自斬七級功乃以歐陽必進總督平江伯陳珪總兵黃如桂巡按妄奏首功竟得錦衣千戶而三人亦得美遷冒朝廷之軍功罪五逆賊仇鸞以貪言論革世蕃受鸞三千金威迫兵部薦為大將及鸞將敗詆排之以飭前愆是勾虜背逆者鸞也而受賄引

用鸞者嵩與世蕃也黨悖逆之奸臣罪六胡虜深入丁汝夔問計于嵩
嵩曰京邊不同敗於邊猶可掩也敗于京不可掩也且虜飽自退耳故
汝夔傳令不戰及陛下逮治汝夔汝夔臨刑始知為嵩所給乃罵賊嵩
誤我是嵩以不戰誤國又以死給汝夔也誤國家之軍機罪七黜陟大
計非可徇私者郎中徐學詩以劾嵩父子革任為民矣乃於考察京官
之時又罷其兄中書舍人應豐賴聖明以免都給事中厲汝進以劾嵩
父子降典史矣而于考察外官之時復逼吏部將汝進黜罷削籍專黜
陟之大柄罪八府部之權皆撓于嵩矣而吏兵二部大利所在尤其所
專主者選除以入賄為低昂將官既納賄于嵩不得不剝削軍士而士
卒失所有司既納賄于嵩不得不濫取百姓而百姓流離利歸一人毒
遍天下人皆思亂失天下之人心罪九嵩諂媚以事上貪污以率下大
壞風俗通賄者貪如盜跖而亦薦用踈拙者廉如伯夷而亦罷黜致令

天下化之以守法為固滯以彌縫為通敏以廉介為矯激以奔趨為練
達習俗漸成牢不可破壞天下之風俗罪十更有五奸用重賄賂以結
陛下左右凡聖意所在一言一動無不報嵩知之故嵩得遂其逢迎之
巧是皇上之左右皆賊嵩之間諜也奸一令義子趙文華為通政使凡
章疏至必將副本先送于嵩御史王宗茂劾嵩一疏文華停留五日方
上故嵩得以展轉撫飭是皇上之納言皆賊嵩之鷹犬也奸二嵩所畏
者嚴衛緝訪乃令世蕃將嚴衛官籠絡迫結姻親是皇上之爪牙皆賊
嵩之爪葛也奸三嵩所畏者科道有言凡進士初選非出其門者不得
為中行推官知縣及考選之時擇熟軟圓融出自門下者方補科道至
五六年無所建白即陞京堂方面故科道諸臣寧忍于負君上而不敢
忤權臣是皇上之耳目皆賊嵩之奴僕也奸四嵩又慮部臣如徐學詩
者不能無言凡各部之有才望者俱網羅門下欲行一事先報世蕃故

嵩得預為布置少有異議先報世蕃故嵩得早為斥逐是皇上之臣工皆賊嵩之心腹也奸五夫嵩之十罪賴此五奸以彌縫之五奸一破十罪立見群臣畏威懷恩固不必問或召問二王令其面陳嵩惡果庶得其實重則置之憲典輕則諭令致仕以全國體賊臣既去豪傑必出即繫俺酋之頸易易耳 上怒命鎮撫司執訊何為引用二王繼盛曰非二王誰不畏嵩者且二王家事必懼為嵩敗當盡言耳 上命杖之一百下法司按之刑部尚書何鰲受嵩指坐詐傳親王令旨律論絞即中史朝賓持不可嵩恚之即謫外獄具上之令長繫待決大學士嵩具奏待罪 上賜手勅眷留之

謹按王司寇世貞皇明奇事曰嘉靖中前後諫臣獨楊最楊爵楊繼盛疏最直傳播天下而得禍俱慘爵獲終牖下其後同贈官賜祭而爵獨缺謚蓋世稱三楊云

以協理京營戎政兵部左侍郎聶豹為兵部尚書○命吏部左侍郎程文德知貢舉以禮部官有二王婚禮故也○提督湖廣川貴兵部右侍郎張岳卒岳惠安人少篤志力學以居敬窮理為宗初入仕諫被杖謫後屢抗於權相屹然不移經理交苗勞績尤著卒後楚粵間多廟祀之久乃追復右都御史贈太子少保謚襄惠○二月詔冊封李氏為祔王妃錦衣衛副千戶李錦女也先禮部以婚禮請 上令具儀以聞至是命成國公朱希忠大學士徐階捧冊封之景王亦冊妃王氏○會試命大學士徐階侍講學士敖銑為考試官取曹大章等四百人時吏部尚書萬鏗請增科額以備守令之選故詔取四百人○湖廣羅田縣省祭官陳緯進白兔詔畜內苑賜緯銀幣○命工部右侍郎陸杰往太和山督造玄像賜坊名曰治世玄岳○奉安先聖先師神位于文華殿東室先是 上親祀聖師十一位於永明後殿至是移祀文華殿遣官行安

神禮如制○辛未金星晝見於申位五日乃伏○詔逮武選郎中周冕于獄黜為民先是楊繼盛劾工部尚書歐陽必進以嚴効忠冒功狀必進奏辯下兵部世蕃自撰題草遺冕令奏之冕發其奸併嚴鵠冒濫襲替効忠狀以聞 上罪冕挾私逮繫詔獄訊治罷為民兵部尚書昇豹遂以世蕃所囑冕稿且覆書高自上疏乞免鵠官允之○三月賜故大學士楊士奇祠額及春秋祭文從巡按江西御史蕭端蒙請也○陝西大饑詔發本布政司及鳳陽等府倉庫錢糧賑濟仍以本省開納銀一萬兩佐之○山東饑詔發臨清倉粟泰山香錢賑之○賜總督三邊尚書王以旂巡撫都御史謝蘭柯相等銀幣以修築蘭州邊垣工完也○詔逮巡按雲貴御史趙錦下錦衣獄黜為民錦因正旦日食劾大學士嚴嵩怙恩寵以張威權假刑賞以行愛憎諸奸貪事乞賜罷黜以應天變疏入嵩待罪乞罷 上溫旨慰留乃手批錦疏曰趙錦此疏可疑且明

誘君上情罪欺天令錦衣衛亟械繫來京後錦至下獄杖之特旨黜為民○命兵部左侍郎楊博無右僉都御史經畧邊務博因條上薊州保定事宜言二鎮兵馬宜清其本原正其紀綱嚴其稽考蘇其困弊既而報薊鎮所修邊牆墩臺已踰大半其未完者請命總督鎮巡嚴督修治皆報可○廷試賜陳謹曹大章溫應祿等進士及第出身有差○虜寇宣府時虜數萬騎由青邊口入犯遊擊孫邦丁碧與虜遇戰却之邦亦被創尋又寇深井堡副總兵郭都出戰死之事聞 上嘉邦碧奮勇禦敵俱賜金幣以都死事可憫卹典如例立祠致祭○閏三月總督三邊兵部尚書王以旂卒以旂江寧人為總督在鎮六年開誠布信虜無深入前後禦虜斬首以千計其所繕障塞皆堅壯可恃西人賴之至是疾作許致仕卒於固原鎮邊民號泣罷市詔贈太保謚襄敏○吏部請以主事等官考選科道詔以為啟奔競不許○詔城京師外城先是給事

中朱伯辰言高皇定鼎金陵于時即築外城聖慮宏遠蓋為萬年之計
文皇移都北平密邇邊塞顧乃無郭者則以締造方始未暇盡制耳邇
言虜警修築南關臣民幸甚緣將事之臣措置失當且所築僅正南一
面規制偏隘故未成旋罷今宜亟為之畜通政使趙文華亦以為言部
請如議至是兵部尚書聶豹等相度京城外四面宜築外城約計七十
餘里以規制圖畫貼說以進 上令擇日興工勅諭平江伯陳圭等督
理工程○虜寇延綏副總兵李梅禦戰死之事聞 上命加優卹如例
○海賊引倭大舉入寇先是都御史王忬巡視海道任都指揮俞大猷
湯克寬勦賊大猷冒險出洋焚蕩巢穴首賊逸去群賊流散克寬統領
步兵往來海堧護城捕賊斬獲亦多忬不肯隱敗冒功擒治奸豪破解
支黨至是賊首王直復糾漳廣群盜勾集各島倭夷大舉入寇連艦百
餘艘蔽海而至南自台寧嘉湖至蘇松迄淮北濱海數千里同時告警

南京戒嚴兵部議遣將領分屯要地令四司官分行點剗而列兵龍
關命職方郎中阮犀犀苦衆持首鼠乃慷慨調度陰訓虛實以為備禦
○夏四月海賊攻破浙江昌國衛屯據凡五日恭將俞大猷以舟師攻
之始去巡視浙福都御史王忬因條上海防事宜一言禁近海豪民通
引倭夷以絕禍本二言照各邊例惟以奮勇血戰為功不以損傷折軍
為罪三言調閩浙兵相無操習以資防禦四言通行兩廣南直隸巡撫
操江官遠行哨探分布兵船彼此夾攻五言兩省守巡兵備官查照原
定地方常川駐劄以便責成六言脅從賊犯准令投首積年渠魁示聽
歸降七言閩浙魚舡量議收稅查理鹽課以助軍餉八言濱海頑民接
濟夷寇走漏消息處以極刑部覆從之○寧夏衛地震有聲○海寇犯
太倉州攻城不克分衆四掠燒燬閩廂公私廬舍是時有失舟倭四十
人突至浙江乍浦所往來平湖海寧海鹽諸境焚戮慘害官軍禦之皆

敗殺傷甚衆凡十有六日竟徜徉奪舟而去○倭寇破松江上海縣其
首據官衙號令餘衆分劫街市○詔革昌平易州經畧大臣○山東盜
李子強作亂時子強聚衆數百人建樹旗鼓倡亂流劫邳州諸郡巡撫
沈應龍督漕運鑛匿不以聞言官論劾之 上令戴罪勦賊久之乃平
○改南京吏部尚書潘潢為南京兵部尚書○倭寇破浙江臨山衛乘
勝西犯松陽知縣羅拱辰督處州兵禦却之賊浮海走叅將俞大猷以
舟師邀擊斬首六十九級既而圍叅將湯克寬叅政潘恩僉事姜廷頤
於海鹽環四門攻之不克縱火焚城樓及民屋數百間而去未幾攻陷
乍浦所知縣羅拱辰復督兵來援倭引去流劫奉化寧化諸處克寬追
圍于獨山民家以火焚之賊半死餘衆奪道走遁於海○江北倭掠海
州殺二百餘人○五月倭寇復入上海縣指揮武尚文縣丞宋鰲死之
時復入上海燒劫縣市知縣喻顯科逃匿尚文及鰲出戰皆死賊屯縣

中七日解宇廬舍焚燒畧盡○詔令太平府同知陳璋蘇州府同知任
環統蘇松諸郡兵禦倭時巡撫都御史言璋素閑經畧請協同環統兵
操練籌畫 上從之璋因上禦倭十二事言倭寇多中國人宜早圖區
處俱嘉納之令密與圖計○虜犯遼東上榆林堡副總兵岳懋遊擊蘇
澄督兵禦之虜走出塞懋等追奔四十里及于小長山斬虜四十餘級
事聞命賜懋澄金幣○詔設副總兵官於鎮江南京給事中賀湮奏言
海寇犯浙東以防禦漸密乃泊守賢山窺蘇湖諸郡竊惟留都根本重
地海洋密邇鎮江京口乃江淮咽喉瓜埠儀真又漕運門戶萬一點虜
橫掠而西致根本震動運道艱阻為害非淺請添總兵駐劄鎮江事平
而罷 上命暫設副總兵乃命分守福興漳泉叅將湯克寬克之提督
金山等處○六月南京給事中和清等疏請減冗費從之清等言邇因
山東徐邳歲荒特遣重臣賑恤第被災之地不止于此若南畿山陝順

德諸府及湖廣江浙所在凶歉或經歲恒暘赤地千里或大水騰溢畝
畝成川或草根木皮掘剥無餘或子女充殮道殣相望其歸德滕沂諸
處則盜賊公行道路梗塞大江以南蘇松濱海諸處則倭夷狂噬井邑
丘墟非破格蠲賑難甦民困乃京師之帑歲既虛各省之撥括已竭額
外之徵求未已軍興之供億尤煩工作之役蠲興挑河之費日廣司農
百方謀畫求所以生財者未得竊謂燃眉已急改絃難緩似當於繁文
冗費力加汰省耳疏下戶部覆言各處災傷已命賑貸至軍國調度臣
等日所籌料今營兵官兵民兵新兵三十二萬計而官校厨匠勇士旗
手又數萬計皆仰給官食光祿寺歲派二十四萬計而連歲額外奏討
又十餘萬計內府供用如黃白蠟昨歲坐派一十七萬五千餘斤而又
召買一十八萬五千餘斤沉速香坐派一萬五千餘斤而又召買一十
四萬五千餘斤諸所督率蓋可類推其無用之兵無事之官無名之支

無益之費不可勝紀夫一歲之入不過三百餘萬而邊儲歲用大約以
五百萬計入少出多無所抵補而近來繕邊撫夷脩城濬河衣裝賞賜
皆出歲額會計之外將來制用益不可支又安有餘裕以佐百姓急宜
如清等議審較取中酌為定制報可○令會議王府庶人口糧禮部尚
書歐陽德上議如成化十三年例則過多如嘉靖四年例則過少今當
視中尉歲米減三之一歲給米七十石妻妾子女使女皆衣食其中不
必計口更給庶人口糧既定則擅婚者減庶人三之一得五十石傳生
者減庶人之半得二十五石庶增損適中 上從部議○以賑濟徐淮
刑部左侍郎吳鵬為兵部左侍郎兼僉都御史總督漕運兼巡撫鳳陽
先是給事中王鳴臣論劾連鑛地方災盜匿不以聞調外任故以鵬代之
○巡撫應天都御史彭黯巡按御史陶承學等請調山東福建兵禦倭
不從黯等言倭勢日熾非江南脆弱之兵承平純禠之將所可辦者請

得便宜調山東福建等處勁兵及勅巡視都御史王忬督兵發舡犄角
攻勦疏下兵部覆言山東陸兵不閑水戰福建海倉月港亦在戒嚴豈
能分兵外援宜令黯等就近調募分布防禦并請命王忬互相應援其
應用兵舡器械徵發所在支用南京兵部尚書孫應奎亦言倭夷劫掠
漸近留都沿江津隘已議調官軍防守應用甲仗芻糧乞命南京戶工
二部給發 上俱允之○經畧邊務兵部左侍郎兼右僉都御史楊博
事竣回疏辭憲職從之○秋七月命戶部左侍郎馬坤督理糧餉時邊
報虜將入寇九門列營以備戰守故也○太平府同知陳璋等擊倭敗
之倭浮海去時璋等統兵敗倭斬首千餘級餘寇出境浮海東遁巡撫
應天彭黯巡視浙江王忬以聞既而擢蘇州府同知任環整飭蘇松兵
備陳璋共贊軍務立有戰功以與時相忤僅蒙欽賞而已倭自閏三月
中登岸至是始旋留內地凡三月攻陷郡縣殺掠焚蕩畧盡百年所稱

蕃盛安樂之區騷然多故矣○詔以兵部左侍郎賈應春總督陝西三
邊軍務應春因上言總兵以鎮守為職而巡撫則贊理軍務至統攝調
遣又總督任之防守踈虞軍餉不繼姦弊不釐責在巡撫若訓練不精
兵革不利士馬不強至于畏縮殘害罪在將官其有摧鋒破敵奮勇血
戰之功撫臣不得同其賞如撫臣身督戰陣躬冒矢石及設策出奇指
授方畧者則議賞以為任事者之勸 上從之○虜酋大舉入寇俺荅
把都兒等入寇分道由大同弘賜堡等邊境合衆十渾源州東犯靈丘
廣昌諸處時總督三邊侍郎賈應春上言各邊間諜不通每虜入寇不
知向往是以無備往往敗事夫虜將內犯必會衆聚兵曠肉掠馬傳箭
祭旗而中國被虜之人亦多臨墩傳報頗有左驗若邊臣加意招撫務
結其心令偵虜向往道路時日預來潛報我得以專力為備視泛然散
守功相十百矣乞令鎮巡招致如得虜情實因致成功者即將原報人

役定為首功報可○詔獎諭魯王願坦賢孝王父端王病嘗藥禱神請
以身代及薨卧苦餒粥者期月徒跣扶輻百里衰經三年終始懇盡喪
禮又捐千金及湖陂數頃賑濟饑荒有司以聞詔賜勅獎諭之○命應
天鳳陽山東遼東巡撫都御史各以本職兼理海防從給事中王國禎
等之請也○擢松陽縣知縣羅拱辰六合知縣董邦政添註浙江僉事
給事中王國禎等言寇入之初守土諸臣狼狽奔竄而拱辰邦政乃能
獨當勦敵立有戰功宜不拘資格量陞濱海一官俾得展施保障一方
故有是擢○吏部尚書萬鏜罷削給事中朱伯辰籍時通政使趙文華
少有文學為大學士嚴嵩所愛及為主事不檢出為鹽運判官後黃緣
嵩復入為郎亡何改通政叅議尋擢通政使日與嵩子世蕃比周嵩目
為義子至是隕陽巡撫缺人嵩願指會舉文華吏部尚書萬鏜遂以文
華名上伯辰上疏數其不可且曰馮聲援而寵賂日章恣貪饕餮而廉耻

盡喪鄉黨羞稱縉紳共鄙問散猶玷班行甚憲何堪任使文華奏辯言
通政使在朝廷之上左右將事例不外補今吏部以處臣而又嗾所親
伯辰論列是必去臣而後快也且鏜前為都御史後以侍郎致尚書乃
通計前俸考滿事涉欺罔猶以不得一品怨望上乃黜鏜削伯辰籍
仍留文華○建大通橋彰義門城樓○戊辰金星晝見四日方伏○詔
擢固原遊擊陳鳳寧夏遊擊朱玉為署都督僉事賜文綺時虜入寧靜
庵口急攻挿箭浮圖等峪關南大震鳳玉率兵援紫荊關虜前哨已有
踰浮圖峪而南者鳳玉夾擊之虜馳去鳳玉督眾追之過浮圖峪守者
具犒鳳玉曰稍緩恐不及賊俟旋軍享之追虜于三家村大戰竟日殺
傷甚眾虜欲北遁又慮為我兵所躡乃以驍騎來戰綴鳳玉兵其眾分
道自廣昌紅沙坡石門峪大金井諸處遁去是時虜氛甚惡中外戒嚴
京師懲庚戌之變人情洵懼及鳳玉力戰退虜事聞上大悅故不俟

勘報命即加陞賞○八月遣官存問靈丘王聰瀟時王年踰八十故賜
勅存問○虜犯宣府虜酋小王子率衆由宣府獨石入犯赤城滴水崖
諸處攻燬屯堡焚戮甚慘凡四日驅掠人畜而去○廣東徭賊作亂肇
慶府東西二山徭賊李朝卿等四千餘衆據山為亂巡按御史郭文週
以聞詔提督總兵等官尅期勦之○詔奪英國公張溶祿一年時祭大
社稷遣溶代溶行禮倉遽科官糾其厭怠不敬上手批曰溶勲臣之
首報以世祿攝祀不敬他任可推姑罰祿一年今後使命代者務加敬
慎毋得慢神欺君二王今方成人俟三年後命攝監禮官宜事事舉劾
毋得怠視○太原府地震有聲○召原任吏部尚書李默復職趨令之
任時廷臣會推都御史屠僑刑部尚書何鰲南京都御史周延 上特
旨用默○河南賊師尚詔作亂尚詔本鹽徒初以私販作奸詣山東響
馬賊攻剽遠近鄰里長之官府不能制先任巡撫謝存孺苟幸無事假

以保長歸德知府尹一仁復令督捕盜遂擅聽民訟肆為威震與王千
斤等橫謀不軌結衆尅日舉兵郡以他事遣卒至鎮尚詔疑偵已執殺
之以祭率衆夜薄城劫庫獄捆載去尚詔有令勿犯學宮勿戮生儒故
守令皆匿學宮以免尚詔家多金宝姬妾尚詔既出攻城柘城亡賴子
乘虛掠所蓄淫其姬妾姬妾識其人以語尚詔遂圍柘城索之不得乃
破城執獲磔之因掠公私帑復圍太康索所怨者二人縣官執其人
縋城與之巡撫都御史楊宜檄都司尚允紹等以宣武睢陳兵援之戰
於鄆陵官兵死者相枕勢益猖獗至數十萬人延及宿州聲言寇鳳陽
隨寇南京南京兵部尚書潘潢與其屬計所以禦之職方郎中阮壘乃
廉得指揮謀勇者白提重兵於池河防禦分委將領於沿江策應賊無
可乘遂不敢南官兵追及於五河縣賊分兵為水陸營允紹環擊須臾
皆破賊遂奔潰不復能軍○總督兩廣都御史應檣檄兵勦廣西徭獍

平之時桂林平樂徭獯擾險肆亂殺知縣張士毅傷百戶曹恩焚掠甚慘檟乃檄總兵鎮遠侯顧寰等督兵進勦斬獲甚衆悉平之捷聞上命廕檟一子國子生并寰等各賜金幣有差○詔賜勅獎諭西河王長子表相之孝晉王新塹奏言表相孝行父母有疾彌月不解帶感雙鶴之祥故諭獎之○九月虜犯山西巡撫都御史趙時春禦之敗績總兵李洙及其子松戰死詔贈洙等官立祠祀之時虜萬餘騎由大同平虜衛犯山西神池利民等堡時表帥馬步軍自出禦之至廣武諸將皆會謀報虜騎有二千餘掩擊可逞時春擐甲欲馳洙以虜悍狡未可易戰時春不聽乃攘臂而前及虜於大虫嶺虜伏兵四起鼓譟而來洙曰公速去吾死於此矣乃與其子松皆戰死全軍俱沒時春投一墩守哨卒以繩引之而上乃免虜尋引上既而錄洙功贈少保左都督子松贈指揮同知賜謚立祠如張達例○詔錄獻皇帝慈烏鳴集之祥江西叅議

王喬齡奏言獻皇帝始封之國舟泊龍江聞慈烏以萬數集江柳向舟鳴噪江西提學副使李慶陽亦述于文集可考其事神異宜錄付史館禮部議覆詔可○莆田地震有聲如雷○河南諸軍分道追賊敗之時指揮袁燦擊之於蒙城縣都指揮張國彥擊之於商丘十字河斬獲甚多師尚詔乃棄軍械變服散其徒而逃○冬十月直隸河南山東大水吏部侍郎程文德上言水災異常言官屢奏持議未見歸一臣以今日內帑不必發大臣不必徃夫救荒莫便乎近莫不便乎拘宜各遣行人賈詔宣諭令各州縣自為賑給聽其便宜處置凡官帑公廩贖納勸借苟可濟民一不限制又近日戶部申明開納事例亦許就本地土納即粟麥黍菽凡可救饑者得輸官計直請劄授官仍登計全活之數定為等則以憑黜陟即撫按守巡賢否亦以是稽之報可○詔立柳將軍神廟於新安鎮賜額致祭柳將軍名匡山東人宋時從軍陣亡嘗見于河

道總理河道都御史曾鈞奏立之。○總兵湯克寬擊南沙倭敗績自倭
眾東遁後江南稍寧惟崇明南沙泊失風倭幾三百人舟壞不能去克
寬及僉事任環留兵守之日久不克至是克寬復督鄧漳等兵擊之敗
績亡卒四百餘人。○詔以灾寇免浙江各經寧波各府所屬秋糧。○總
兵湯克寬引舟師追擊滌缺倭擒之先是倭賊百餘由華亭縣滌缺登
岸流劫戚木涇金山衛等處至是移舟泊寶山克寬引舟師追擊及於
高家嘴燬其舟斬七十三級生擒十四人。○兵部議武舉鄉試三次中
式者准經起送會試永為定制從之。○命行人侯東萊勅諭南直山東
撫按官督率府州縣官破格從權設法賑濟饑民仍令以勅諭刊示百
姓從吏部侍郎程文德奏也。○詔發太倉米賑濟饑民仍令有司掩骼
埋齒時 上問大學士嚴嵩民多無食若何嵩言四遠饑民來京求食
一時米價騰踊請以太倉米數萬石平價發糶仍禁市行不許多買轉

賣以索高價嵩又言民有身無一錢者仍坐斃道路請于十萬石內以
八萬石糶濟二萬石委官運赴城外每早召集饑民人給一升 上曰
朕意正如此令以六分出糶四分給貧苦者既而 上又曰朕思饑民
必有弊于道路者暴露骸骨朕所不忍宜有以處之乃勅令在京行五
城御史在外行撫按各督有司查視掩埋以稱朕不忍暴露之意。○諭
通錢法 上諭戶部錢法未通亦宜計處便民戶部言錢法不通由輕
重二弊未能迭相為用請以新舊諸錢定為二則上則七十文准銀一
錢中則倍之官私收稅亦准此例不得輒有增損仍勅御史嚴衛費察
有阻壞錢法者治之 上曰錢法乃小民目下之急且不必深文凡係
嘉靖制式以七文易銀一分洪武等式與前代雜錢加倍違者科罪。○
巡撫河南都御史楊宜獲賊首師尚詔等命加宜祿賜金幣尚詔流劫
凡四十餘日破府城一州縣城八屠燬鄉鎮殺戮十餘萬人三省震動

及官軍追敗變姓名走至是獲於山東東昌莘縣其賊黨潰散山東河南及江北鳳陽諸州縣各有所獲宜乃悉錄其名以聞 上以宜平賊有功命進俸一級仍賚以金幣凡所在捕賊即於所在誅之○倭寇興化府指揮張棟等擊走之時有倭舟失風飄至興化南日舊寨登岸流劫殺千戶葉巨卿棟率兵擊之逃走知府董士弘復糾民兵獵戶與棟等圍而殲焉是時江南海警倭居十三而中國叛逆居十七未幾南日舊寨復有三舟登岸棟與士弘擊之乃擒真倭數人○十一月詔諭鑄錢 上諭工部鑄洪武至正德紀元九號錢一百萬錠嘉靖紀元號一千萬錠○詔勒御製太和山玄殿紀成碑文于山門前先是侍郎陸杰言本山自興工以來屢現祥光請勒碑于山門故有是命○總督薊遼軍務何棟罷先是兵科給事中王國禎論劾棟衰頹巧偽總兵張堅暴戾成勲貪庸巡撫山西都御史趙時春誇詡僥倖俱宜罷斥更置 上

令勲閑任堅調用國禎仍疏堅以千金賄陸因許兵部尚書聶豹迂踈狠愎不畏公議 上仍令堅閑住棟亦乞罷許之○總督兩廣都御史應檟卒贈兵部尚書檟遂昌人貞介自持不隨人俯仰居守務實政與時多忤而所至民咸稱之○十二月命兵部左侍郎楊博兼右僉都御史總督薊遼軍務○詔令孟夏冊封宗室禮部以歲終當遣官冊封宗室而畿甸灾傷驛遞艱阻請移來年四月應古者孟夏封諸侯之禮詔可著為令○南京兵科給事中賀涇條奏拱衛留都七事一議事權言凡南京有警地方兵部會推知兵大臣一員在江南則居新江口等處在江北則居滁和浦口等處居中調度相幾勦捕二簡官軍言各營軍士宜汰其老弱補以精壯所司以時閱視許動支營房地租銀犒賞三濬城濠言通濟十三門兵馬通衝有為民居妨礙者折毀神策三門濠河有填淤者濬治四肅門禁言守城門軍士原給器械宜專官查驗整

理五詰奸細言京城內外及徐滁和地方宜編立保甲嚴行譏察六處探船言水車戰舡宜倣沙船改造其艖艚接舡當量存之七重應援言池河新營所屬飛熊三衛勅視巡官聽兵部節制江上有警亦聽鳳陽撫按調遣 上從其議○詔進總理河道右副都御史曾鈞為工部侍郎職掌如故時漕河工完故有是命工部尚書歐陽必進等各賜金幣有差仍令禮部祭告河神

甲寅嘉靖三十三年

春正月壬寅朔 上不御殿○詔廷杖六科給事中張思靜等以賀疏中失擡萬壽字故也○彙顏屬夷寇掠梳木關口叅將李意等搆得首惡通漢總督侍郎楊博請繫通漢於獄俟諸夷入貢械赴喜峯口宣示使知所警從之○康妃杜氏薨妃裕王母也謚榮淑後追尊為孝恪皇后○詔發太倉米給各處就賑饑民百里以內至者人三升遠者加至

二十升而止○陝西階州地震○詔停邊選事例先是以邊方之才每歲春季許北方舉貢監生成年就選既而邊吏有缺吏部拘於一年選之例不時得補而正選守部者又以年次不得補邊方遂至停擡各種不便吏部尚書李默等言祖宗創制每歲六選法最精密頃年酌行遠方爭例已非舊制今又加立邊選名色吏道益雜非但承用不便而已 上亦以為然命罷之○倭寇掠蘇松時賊據太倉南沙五月餘官軍列檻海口圍之數重不能破軍中多疾疫乃佯棄槩舟開壁東南陬賊遂潰圍出海轉掠蘇松各州縣○謫吏部文選郎中楊載鳴為典史時載鳴以行取疏上而安慶推官郭來朝當給由并捧聖壽表入京道聞行取報即棄表歸巡按御史問東等劾其不敬因及任內貪暴狀 上令革來朝職為民因切責吏部言該司郎中欺蔽為奸于是謫載鳴為將樂縣典史○二月詔贈歸德檢校董綸為歸德府同知柘城衛舉人

陳聞詩為鳳陽府同知各立祠祀之初師尚詔反至歸德知府及守衛官皆遁綸獨率民兵巷戰被執垂死猶刃數賊其妻賈氏及一姪一僕皆從綸死尚詔素聞聞詩名約克城之日必生致之以為帥既而衆擁聞詩至不屈賊斬其家屬數人以脅之聞詩知不可脫乃紿之曰必欲我行勿縱火勿殺人賊許諾乃擁令聞詩上馬行聞詩遂不食三日至鹿邑自縊至是巡撫楊宜奏上其狀 上令贈官立祠○罷南京刑部尚書顧應祥初應祥秋奏決囚比得報已踰冬至二日應祥竟決之監刑御史及言官會劾應祥事下吏部尚書李默覆言應祥徒知尊命而不知冬至之後例當覆請安得遽決以傷元陽之氣似應以過誤薄罰 上勒令致仕併奪監刑及郎官俸○英國公張溶獻玄嶽神光圖先是遣溶祭玄嶽至是還復命言當祭時天氣晴和方初獻神殿南香爐峰忽出五色光殊彩四燭祭畢始隱隱徐沒因繪神光圖以獻 上報

聞○戶部尚書張潤卒贈少保謚恭肅潤臨汾人端雅有度而居官二主於奉公剛正自持屢擢不變人皆稱之○三月詔發太倉銀四千三百兩賑上林苑諸署饑民○詔造大祀十二章衮服弁服○命工部右侍郎陸杰兼兪都御史督修顯陵時太和山將訖工因復有事稜恩殿使杰督之○詔分屬紫荆諸關於各道總督薊遼都御史楊博言易州井陘大名三道皆重備邊而所屬地方煩簡夷險各異卒遇有警恐顧此失彼請自今專以紫荆關屬易州道倒馬龍故三關屬井陘道順德府所轄關隘屬大名道并將畿內府州縣衛所屬分隸之每歲當秋防之時仍令井陘道暫住曲陽大名道暫駐順德以備不虞詔可○議開膠萊新河遣御史何廷鈺賚勅視之○禮部尚書歐陽德卒贈太子太保謚文莊德泰和人字度宏粹初知六安州遷南京刑部員外郎上擇諸臣有文行者列侍從改翰林編修掌詹事府事召直無逸殿在禮部

嘗議二王建儲婚禮及康妃喪儀雖時與上意忤然上察其持正
 卒優容之海內士大夫方想望其風采會病卒士論惜之○倭寇掠通
 泰諸處時自蘇松掠民舟入海趨江北大掠通州如臯海門諸州縣復
 焚掠各塩場餘衆有漂入青徐界者山東遼東俱震巡撫遼東都御史
 江東因條上海防八事部覆議從之○以吏部左侍郎王用賓為禮部
 尚書○以屠大山為兵部侍郎兼僉都御史總督軍務糧儲巡撫應天
 時吏部尚書李默言蘇松巡撫所轄十二府地遠難兼况當軍興調兵
 轉餉非一人所能請設提督軍務大臣專責勦賊而巡撫專主糧餉
 上曰督撫兩設事推得無掣肘乎其與兵部僉謀以聞于是默與兵部
 尚書聶豹等議奏設一官兼兵餉如浙江例上從其議乃以大山為
 之○夏四月京師大疫命發藥救之仍贍給米穀是日雷始發聲先是
 上諭禮部曰今春雨澤固降雷未發聲勅臣工同加脩省至是諭賑

疾疫雷乃發聲○詔罷總督宣大兵部尚書蘇祐上以祐年向衰罷
 令回籍而以兵部右侍郎賈應春代之○詔鎮守雲南總兵官沐朝弼
 襲封黔國公先是黔國公沐紹勳無嫡嗣庶生二子朝輔朝弼朝輔長
 襲父爵比卒有二子融鞏俱幼以優給候襲而令朝弼以都督僉事攝
 鎮雲南未幾二子俱殤撫按官勘實以聞請令朝弼襲爵許之○倭寇
 攻嘉興初自海塩趨嘉興叅將盧鏜等帥兵禦之稍却次日復戰於孟
 宗堰伏發殺官軍四百人溺死五百人都司周應棋等死之賊乘勝入
 據石墩山分兵四掠至是攻嘉興城副使陳宗夔帥兵禦却之焚其舟
 賊遁入乍浦與長沙灣寇合犯海寧諸縣既而東掠入海至崇明縣夜
 襲破其城知縣唐一岑死之○浙江地湧出血時慈谿縣民家地湧血
 高尺餘○京師外城成進提督京營平江伯陳圭等官廕子賜賚有差
 ○命工部右侍郎盧勳提督顯陵陵恩殿工程時陸杰卒故命勳代之

○五月倭寇掠蘇州倭自崇明進薄蘇州府城大掠時兵科給事中王國禎上禦倭方畧言懸賞招降賊首王直非計兵部尚書聶豹覆言海賊與山賊異山賊有巢穴可以力攻海賊乘風飄忽瞬息千里難以力取臣聞王直本徽人以通番入海得罪後嘗為官軍捕斬海寇陳喫主等及餘黨二三百人欲以自贖而當是時有司不急收之遂貽今日大患故倣岳飛官楊么黃佐故事懸賞購募以賊攻賊非輕王爵以示弱也 上以國禎言為是令一意勦賊脅從願降者待以不死賊首不赦 ○調原任湖廣副使張景賢整飭淮揚兵備專理海防時海寇不靖總督漕運侍郎鄭曉及直隸巡按御史李逢時請添設兵備專駐泰州以防通泰海州海賊出入之路吏部覆從其請因調景賢為之仍列銜于湖廣 ○詔復以侍郎賈應春提督陝西三邊軍務命兵部戎政侍郎許論總督宣大山西軍務初應春自三邊召佐本兵尋又移鎮宣大以代

者江東未至久留不發御史胡宗憲等言東患病蒞任無期而三邊去宣大久遠今時已入夏防秋伊邇宜留應春仍總督三邊別於近地推補宣大庶彼此調度有人而邊方有賴故有是命 ○彗星見時彗出北斗天樞星旁 ○遣御史溫景葵兵部主事張四知往山東募兵禦倭 ○山東益都縣地震 ○六月辛未彗星漸北行犯文昌 ○詔籍京師召募民兵充巡捕軍復統領民兵革職叅將左灝原職聽用初庚戌變召募民兵四千為一營防禦京城設叅將領之至是逃亡千餘灝請勾補兵部言此皆烏合無從清勾宜汰老弱所餘精壯不足一營宜附籍京營巡捕以資實用因請復灝職從之 ○虜入大同塞總兵岳懋死之詔逮繫巡撫都御史侯鉞及故總督宣大兵部尚書蘇祐于獄俱削籍為民時虜衆數萬入大同塞懋帥師出禦力屈而死全師覆沒巡按御史毛鵬以死事聞因論劾巡撫侯鉞等 上大怒逮繫鉞下詔獄既而兵部

言祐先任督撫漫不省憂貽患今日乃復逮繫祐下獄俱黜為民贈懋少師左都督謚壯愍廕子立祠祀之。雲南楚雄府安寧州地震有聲。○以王忬為右副都御史巡撫大同初侯鉞被逮。上問大學士嚴嵩可撫大同者嵩倉卒不知所對。上曰朕知王忬可乃手勅吏部曰朕思大同撫臣須得人乃可其以王忬為副都御史巡撫其地趣令之任。先是忬在浙江舉盧鏜釋柯喬激勵諸將爭奮逐北復廉為偵刺凡沿海大猾稱倭內主者悉繫案覆其家破解黨與自是倭奴不復知我虛實與所從向往而餘艘在海中者亦無得以菽粟火藥通往往食盡自遁散又行視諸郡邑未城者計寇所由緩急次第城之凡三十餘所杭州官吏以烽火不時發日集坊民登陴守宿怨苦載道忬令罷之曰吾斥堠明無慮弗及柰何先敵而逆受困救耶一郡大喜至是往撫大同忬去而浙中之禍始慘。○擢徐州兵備副使李天寵為僉都御史巡視

浙福海道時王忬往撫大同故擢天寵代之。○京師大雨平地水深數尺漂沒墻垣廬舍命戶部發銀賑濟工部濬渠洩水。○漕運都御史鄭曉疏請收義勇從之曉言倭寇類多中國人其間有勇力智謀者可用每苦資身無策遂甘心從賊為之嚮導若不早圖區處必為腹心憂乞命撫臣于軍民中查舉與以義勇名色給以月糧令其無事率人捕盜有事領兵殺賊立有功劳量議官職奏請陞受則悍士漸受條籠不惟中國之人不為賊用抑且異日可備將材之選即今從賊者宜出榜諭許令歸降遣還故土擒斬賊徒如例給賞才力可用立功贖罪俟有勞績亦與叙遷不然數年後或有如盧循孫恩黃巢王仙芝者蓋至滋蔓難為撲滅疏入報可。○秋七月廣東番賊糾倭寇千餘剽掠海上官軍擊敗之擒賊首方四溪等餘黨遁去。○命有司修築通惠河堤岸開壩以久雨水溢故也。○倭寇流劫自蘇州至嘉善縣轉趨松江出海叅

將俞大猷擊敗之於吳淞所擒七人斬首二十餘級。○西苑獻嘉穀三穗雙穗者七十八本禮部請宣付史館率百官賀。上報曰天賜玄庥不可慢忽今年夷狄作亂大水疫荒任事之臣不見盡心處置何以賀為。○御史徐坤疏陳馬政言寄養馬匹本以專備京操故歲收二萬而用有餘乃今各邊奏討頻仍外圍空虛專憑內廐然則苑馬太僕寺設於外者豈皆虛設乎臣請自京師之外至宣大極邊遇有奏討宜量給之餘則勿許各邊苑寺廢弛者亟行撫臣整理先補種額以裕孳生之原次查草場以清芻牧之地又專任守巡一人時加稽察則廐牧充于塞上而內圍不至空虛。上詔如議行於是陝西苑馬少卿盧瑩條上馬政事宜言宜督逋負明印烙訓醫藥均地差以救目前而闢場圃廣孳畜以為久計。上皆嘉納之。○諭發內帑銀一萬兩於山東東嶽泰山神廟從陶仲文請也。○侍讀嚴訥給事中曹禾郭仁各請量蠲浙直

被倭郡邑田租從之。○詔駙馬都尉鄔景和大學士嚴嵩徐階李本吏部尚書李默禮部尚書王用賓錦衣都督陸炳入直西內其吏部侍郎程文德郭朴禮部侍郎閔如霖吳山以侍從文學撰文不入直景和以不諳玄理辭免入直俄以金幣賜玄修諸臣猶及景和愧且懼疏稱臣無功乞辭使臣洗心滌慮效馬革裹屍之報。上怒曰景和故出不祥語詛上耶法司當以怨訕律。上姑寬之令革職發崑山原籍為民。○八月進徐階太子太傅武英殿大學士李本太子太保文淵閣大學士。○南京太僕寺卿章煥條上海防四事一曰築城堡言兵因地形今江南之變千村萬落皆為戰場而郡縣且相率閉城奈何使各鄉兵當賊宜急築城堡於諸鄉以固守併力于郡縣以待戰郡縣有備則賊不敢散掠而謀阻諸鄉堅守則兵不必偏分而力裕將人人自為戰守音皇祖嘗命湯和視海上擇要地築數十城以備倭而東南安堵此其

驗也二曰預軍需言西北諸邊一切軍食皆有司先期部署以聽督撫調度故卒有緩急可咄啐而辦今臨變之時上官漫督之主者亦漫應之眉睫間已成胡越何況百里之外嗣後軍中之需賞功之費一一會計所出貯之別庫使軍門不以煩有司有司不以煩居民則萬全之術也三曰練士兵言今議者悉稱調兵不知少發則不足多發則用不繼久駐則師老費財暫駐則兵散而賊復入急之則怨寬之則驕而為亂宜訓練士兵漸罷容兵若士兵不足宜募近海丁壯及有罪調發者居之海墻給偶配予田宅使之土著而忘其鄉是城堡之外益以藩籬計無便此者四曰收奸豪言外賊易見內賊難知今海賊深入內境凡我動靜無不知之者誰為之又其始至千人四布莫測而鳴號畢集者又誰為之皆奸民所釀也誠使郡縣得人示寬大布恩信問疾苦時拊循使反側者將反本而呼天何變之能生且海上多壯士負氣任俠而不

肯下人我能制之則為我用不能制之則為賊用故安反側收豪傑治亂之機也疏下所司議行○募兵叅將李逢時等追擊倭寇於新涇橋敗之時倭寇自嘉興遠屯採淘港枋林等處進薄嘉定縣城逢時與許國以山東民鎗手六千人至與賊遇於新涇橋逢時率麾下先進取之賊退據羅店鎮官軍追擊之擒斬八十餘人許國恨逢時與之同事而先不約已乃別從間道襲賊以分逢時功追至採淘港乘勝深入伏起官兵大潰溺水死者千人指揮劉勇等死之諸軍倉卒不整遂大敗○詔增造南京新江口兵舟二百艘先是額設四百艘操江都御史潘珍奏減其半至是魏國公徐鵬舉以海寇請改沙船增復舊額從之○九月詔停徵蘇松常鎮四府租一年以被倭故也○套虜數百騎犯紅井官兵襲敗之遁去○禮部尚書黃綰卒綰黃巖人起家任子致八座人不以為忝第以隱語憾楊一清公論疵之○詔徙代府樂昌王府於朔

州代王以宗室繁衍請徙之以寬民力從之○南京右都御史王爌卒
贈工部尚書爌黃巖人抗直敢言為尹留都有惠政民立生祠至今祀
之○昌平白羊口草場火詔奪守備齊維禎戶部員外郎劉崇文俸二
月○以南京都御史吳鵬為工部尚書○吏部尚書熊浹卒浹南昌人
少有志節議論侃侃恬于寵利有古大臣風後謚恭肅○詔以倭亂罷
浙江歲貢魚鮮○冬十月虜寇薊鎮總督右都御史楊博檄總兵周益
昌禦却之時虜攻薊鎮邊牆百道並進四晝夜不克乃退屯古城川次
日復南旋駐虎頭山夜火光滿野連亘數十里博募死士執火器潛入
其營中至夜齊發虜衆驚擾徹旦乃解去先是 上聞警報沓至為之
盱食遣廠衛卒校往調其狀至則見博環甲登陣宿止古北口垣上而
諸將士據牆禦敵甚力 上聞大喜詔發太僕銀一萬兩犒薊鎮守牆
將士賜博及益昌各服色衣一襲○詔免是歲兩京決囚○詔存問南

京兵部尚書致仕湛若水時若水年九十廣東撫按官以聞禮部請加
以存問從之○詔還賑濟宣大侍郎陳儒初儒賑濟請以便宜查覈山
東河南山西屯田錢糧之數兵部言兵荒之後恐益騷擾乃詔儒還○
十一月倭寇嘉湖倭自柘林分掠嘉興湖州二府都指揮劉恩至逆戰
於嘉興縣却之○詔更賜總督湖廣川貴侍郎馮岳勅令其節制容美
十四司初容美土官田世爵與把隘土官向元揖累世相讎元揖幼世
爵佯名解雙遣女嫁之因誣元揖以奸云恐激變請令自捕元揖下獄
遂盡俘向氏沒入其產撫按知其謀責與元揖對狀世爵不出設衆自
備與羅峒叛舍黃忠等通事聞下督撫馮岳等議言世爵驕橫有司不
能治而獨父係元揖甚為不平宜令出獄假督臣節制容美之權問世
爵抗違之罪若再不悛繩以國法部議從之○詔廷杖禮部儀制司署
郎中聶靜默為民奪員外陳全之主事賈衡吳仲禮俸以冬至類進賀

表誤書三十二年也尚書王用賓等具疏自劾得旨不治○十二月虜寇大同塞總督侍郎許論巡撫都御史王忬徵兵擊走之捕首虜百餘級牛馬稱是詔進忬兵部右侍郎兼右都御史仍巡撫大同許論及諸將士賞賚有差○兵部尚書聶豹疏陳防夷事務言倭寇作難設官增備調兵選將督撫諸臣協謀共濟滅賊有期乞申飭各官築城堡掘坑塹固守要害團練士兵招撫脅從嚴賞罰之條厲交通之禁司府縣官吏分別去留治以軍法先是豹盛稱南北戰功請 上謝玄受賀遂階一品至是以警報日聞恐被譴責故為是條陳規脫已責云○已丑大風揚塵四塞○倭寇陷青村所○福州府地震○命鎮遠侯顧寰總督京營戎政平江伯陳圭卒故命寰代之○詔遣原募山東禦倭兵還自採淘港之敗東兵遂不振會主將李逢時等被逮皆鬱鬱思歸稍自引去總督張經請下有司追捕兵部言此輩俱係北土烏合之兵驅之蘇

松水澤之地固甚非宜今不如悉放遣之詔可

乙卯嘉靖三十四年

春正月丁酉朔 上不御殿○詔以倭警命南京掌左軍都督府事豐潤伯曹松專督孝陵軍防護陵寢○詔逮繫應天府尹李珊請京訊治革守備魏國公徐鵬舉任奉祀孝陵時府獄死囚吳伯恭等十五日越獄奪城門走詔逮珊訊械至法司以案証在南請下巡按御史查覈久之御史為開釋請仍在籍聽用從之○以南京兵部尚書張經總督直隸浙福軍務時朝議欲徵狼士兵勦倭寇以經嘗總督兩廣有威惠為狼士兵所戴服故用之勅令節制當天下半得以便宜從事開府置募自辟叅佐經亦慷慨自許中外忻忻皆謂寇不足平○都御史屠僑卒謚簡肅僑鄞縣人有大節居常退孫若不能臨事屹不可奪歷官四十年以清謹著聞○詔錄宋儒朱熹十三世孫法襲五經博士○以原任

兵部侍郎張時徹為南京兵部尚書秦贊機務○詔總督京營鎮遠侯顧寰工部尚書吳鵬閱視脩理山陵橋梁墻垣工程○二月給事中黃謙疏陳邊計納之時宜大告饑邊計缺之謙條上三事曰議積聚覈逋負復公田戶部覆奏報可○罷開膠萊新河先是御史何廷鈺請疏濬新河詔遣廷鈺往會山東撫按官勘報至是報言工費難成遂罷其議○罷新耕籍田遣戶部尚書方純祭先農之神○虜分道寇宣府懷柔川龍門城等處○調吏部左侍郎掌詹事程文德為南京工部左侍郎尋黜為民初文德奉詔供撰玄文 上疑有欺及吏部會推南京吏部尚書有文德名 上疑文德欲自脫遂調之既而疏辭有瞻望闕庭傍徨躑躅欲去不忍之句 上謂其猶懷欺訕命黜為民○遣工部侍郎趙文華往祭海神兼督察海防時大學士嚴嵩言海寇猖獗宜遣大臣禱祀東海以奪其魄宣布朝廷德意即令察視賊情訪求區處長策因

薦文華可用 上從之乃賜文華印記令得以密啟言事文華本嵩私人既奉命出憑宥恣肆所睚眦即立摧仆有司無不望風震情奔走供奉江南為之困弊至於牽掣兵機顛倒功罪以致紀律大亂戰士解體雖徵兵半天下而賊勢愈熾人皆以為嵩引用匪人之罪云○詔修理南京城垣○兵部尚書聶豹罷時南北多事 上深用為慮責成本兵甚切而豹事多推諉不當 上意 上以豹年衰不勝重任典入直諸臣言之于是豹引疾乞罷 上特令間住○三月以總督薊遼保定都御史楊博為兵部尚書時聶豹罷故召博代之○廣東高州地震○詔進王忬為兵部左侍郎兼右副都御史總督薊遼忬撫大同方半歲而薊遼總督楊博入為本兵廷舉忬 上手署用忬代博令速赴鎮不必候代其大同巡撫事行總督許論暫理○總督許論擒山西巨盜郭尚儒等平之尚儒渾源人初聚眾四百餘處廣靈西山鉄搬崖為巢劫掠

遠近守備指揮方琦率兵出捕為尚儒所執傷亡甚衆論檄叅將李欽副使楊順等以計擒之其黨遂解去詔賞論等銀幣進順俸一級○宣安公主行下嫁禮適駙馬都尉李和七寧晉人先是選尚皇三女寧安公主至是成婚公主入謁奉先殿見上及皇貴妃賜宴宮中和朝見皇貴妃亦賜宴如禮○蘇松兵備副使任環敗倭于南沙野茅洪時環督叅將解明道等以舟師與倭戰敗之斬首一百餘級○夏四月詔賞廣西田州土官瓦氏等銀幣時瓦氏併孫男岑大壽大祿引土狼兵應調至蘇州總督張經分配總兵俞大猷等殺勦倭寇奏聞令賞銀紵餘令軍門獎賞○詔議處民兵兵部尚書楊博奉詔議上言京城民兵之設始自庚戌虜患之後倉卒召募類多烏合今欲盡汰之則細民遽失月糧於情不堪且巡檄京城分布不足與其取之于營兵不若議處民兵之為便也請勅所司汰其老弱存其精銳其原出真保者發兵備道

籍為民兵在京者仍隸巡捕叅將管攝與火哨軍人相無巡邏逃者不補上從所議○狼兵與倭戰敗績時倭據川沙窪柘林為巢新倭復至地方甚恐聞狼兵至人心稍安趙文華時至松江祀海乃厚犒狼兵激使進勦至漕涇遇倭與戰不勝頭目鍾寅黃繼等十四人皆死於是賊知狼兵不足畏復肆掠如故○倭寇犯江北淮揚等處由通州餘東場海門東夾巷地方登岸流劫狼山利河等鎮突入通州南門燒民屋舍而去○詔駙馬都尉李和後軍都督府帶俸歲祿一千石賜寧安公主莊田二千頃有奇○詔修江西許旌陽真人宮○詔賜湖廣容美宣撫司土官銀幣世爵獻大木五十株備承天工所應用故加獎賞○詔令雲南鑄錢給事中殷正茂言鑄錢可助國用請採雲南銅至湖廣城陵磯鼓鑄部言本地便從之○巡按浙江御史胡宗憲請諭日本國王從之宗憲言往時日本入貢多不及期請待其復來得以便宜謝遣仍

令有司移檄于王問以島夷入寇之狀兵部尚書楊博奏言令按臣移檄日本國王責問何人倡亂令于半年間立法鈐制號召還國即見忠款雖貢期未及必為奏請否則是陽為入貢陰蓄異謀也 上是其議

○提督兩廣鮑象賢執廣東賊徐銓方武等殺之先是銓與海賊王直糾結倭夷縱橫海上至是象賢檄海道副使汪栢等督戰銓等就戮前後斬首千二百餘級海濱頗靖○五月倭寇犯嘉興總督張經遣兵擊走之時倭四千餘人突犯嘉興經分遣叅將盧鏜等督狼土兵水陸擊之賊遂北走平望副總兵俞大猷以永順宣慰司官舍彭翼南兵邀擊之賊奔回王江涇保靖兵復擊其後賊大潰諸軍共擒斬首功二千有奇餘賊數百奔走柘林東南用兵此為第一功云○詔逮繫直隸浙福總督尚書張經及叅將湯克寬詣京下獄論死初經至浙驕倨自任有府同知張任先為郎唾經匕啣之及行部至其府夜令人踰城出質明

詰責任司兵防不嚴城守褫衣冠縛而箠之藩臬府官俱不敢營解得監織內臣馳入止之任囚首保跪出不勝辱欲自縊知府守之乃免國朝府貳無受笞者遠近駭異人心稍不予經其所用諸將佐何卿沈希儀輩名位已抗驕不為用而新募士又慄悍不任兵所徵田州兵瓦氏山東鎗手又不受律以故名實頓損時督察侍郎趙文華挾嵩凌經經自以大臣儼然其上不為屈文華志連疏劾經謂其才足平賊第以家在閩畏賊報讎故趨趨縱舍賊以為德耳會臺諫亦有言者 上怒經玩寇殃民詔遣官校逮捕經及克寬訊問時經已破倭于嘉興王江涇捷聞兵科奏乞留經平餘倭自効不聽既而經等至京下法司議罪經上疏自理言倭寇犯嘉興即委叅將盧鏜督保靖兵援嘉興委俞大猷督永順兵由柳湖間道趨平望以扼賊路令湯克寬引舟師從中擊之一戰而勝凡斬馘一千九百有奇焚溺死者無筭賊氣遂餒豈有一毫

怠玩之念自臣蒞任方半年前後倖斬且以五千計惟是智畧淺短不能俄頃掃盪此則臣之罪也疏入不報刑部尚書何鰲竟論經與克寬罪死繫獄待決○倭寇掠崑山縣石浦等鎮時原屯川沙窪倭賊復突犯閘港周浦等處奪舟過浦分掠泗涇北幹山僉事董邦政遊擊周藩引兵追擊遇賊驚潰藩被創死軍士死傷者幾三百人賊遂屯駐石塘橋流劫崑山石浦諸鎮○鳳陽府大水雹壞民田舍○發太僕馬四百餘匹給延綏留戍薊鎮軍士○南京御史屠仲律條上禦倭五事一曰絕亂源言宜禁放洋巨艦窩藏巨家及下海奸民二曰防海口言宜守平陽港拒黃花澳據海門之險則不得犯温台塞寧海關絕湖口灣遏三江之口則不得窺寧紹把鯨子門則不得近杭州防吳淞江備劉家河則不得掩蘇松嘉興三曰責守令言宜責江南守令當以訓練土兵保全境土為殿最四曰議調發言近日徵調各處民兵無慮數萬而虜

功不奏坐不善用兵之十弊五曰作勇敢言沿海如沙民鹽徒打生手及村庄悍夫皆勇悍可用宜獎諭收錄令併力戰守疏入詔部議行之○詔江西南贛吉三府行廣鹽每年定以二十萬引依例抽稅內二分存留八分解部表臨二府仍行淮鹽不許抽稅著為令○官兵追倭於馬頭鎮殲滅之初倭五十餘人自山東日照縣流劫東安衛至懷安贛榆縣復自贛榆流劫沐陽桃源等處至清河阻雨徐邳官兵分道蹙之殲於馬頭鎮民家斬首四十一級此賊自日照登岸以數十人流害兩省殺戮千餘人至是始滅○柘林倭賊縱火焚巢駕舟二百餘艘出海東趨○蘇松兵備任環督總兵俞大猷及永順官舍彭翼南等土兵進攻陸涇澳賊敗之斬獲甚衆餘賊奔潰○倭寇常熟知縣王鈇及鄉官泰政錢泮死之詔贈鈇及泮官時鈇率衆禦賊泮復率耆民家丁追賊及於上滄港為賊所掩擊俱死巡按御史金淞以聞詔贈鈇為太僕少

卿泮為光祿少卿各任一子錦衣百戶世襲立祠死所祀之○詔復開福建鐵冶先建寧延平二府歲課鐵五十萬斤解部尋以浙省銀礦盜發禁革至是巡按福建御史胡志夔以為言詔復之○六月吏部請造勲爵宗圖文冊從之初勲爵宗支舊無冊籍一遇故絕爭襲紛然無所考証吏部請乞如軍職貼黃例行兩京五軍都督府將各公侯伯父祖始封承襲來歷并立功者的派子孫與應襲者所自出備造宗圖文冊一存本府一送本部一送吏部每五年一造請著為令以杜紛爭詔可○倭寇江陰知縣錢錞死之時倭據江陰蔡涇閘錞統狼兵禦之遇賊於九里山時已薄暮雷雨大作賊伏兵四起狼兵悉奔惟餘錞及民兵八人盡死於賊巡按御史周如斗以事聞詔贈錞光祿少卿亦廕子立祠○叅政任環督總兵俞大猷擊敗倭于馬蹟山時三板沙倭賊奪民舡出洋環督大猷引舟師追擊于馬蹟山擒倭首灘捨賣及賊五十七

人斬首九十三級是日倭舟被海風飄回者五十人屯嘉定縣民家環率兵攻之不克乃投火民宅焚之賊盡死既而環有親喪巡按蘇松御史周如斗以倭寇未平請留之詔奪情任事如故○改南京戶部右侍郎楊宜為兵部右侍郎兼僉都御史總督直隸浙福軍務上聞周玠疾甚故罷玠以宜代之○詔罷巡撫浙江都御史李天寵尋逮繫請京論死擢巡按浙江御史胡宗憲為僉都御史巡撫浙江時宗憲與趙文華合文華欲扶宗憲宗憲亦力排天寵欲奪其位言在浙嗜酒廢事上令罷黜之文華遂薦宗憲乃以宗憲代天寵既而復詔逮繫天寵請京下獄以失律喪師竟論罪死○秋七月遣道士二十三人分賫香帛祀歷代帝王陵寢○巡撫四川都御史張臬討夷民阿康返之亂平之康返居宜賓縣恃險為亂有司慮得罪匿不聞久之賊勢益熾至數千人焚屠村鎮臬督僉事焦稷集土兵二萬餘討平之擒康返諸巢皆破

事聞賜臬等銀幣有差○詔以馬邑生員張蕙為所鎮撫初蕙五月間為虜所獲俺答令其主事馬籍因知其數又嘗送置丘富營頗得其謀在虜中凡二月得間奔歸言俺答求紹二部兵可二萬六千人叛人丘富日夜導虜為鈎梯攻城造舟渡河靜樂等縣妖人盧山佛等許為內應欲奪左右威遠三城自立為主以接俺酋入寇總督許論上其事請優錄蕙為歸義者勸故有是命仍賜銀兩○倭犯南京先是高埠逃倭自杭州西掠至嚴州淳安僅六十餘人以浙兵逼急突入歙縣流劫至南陵縣趨太平府時操江都御史駐太平督兵禦之賊引而東犯江寧鎮守備遣指揮朱襄等率勇士數百人出時賊已至板橋襄等急緩不知祖禡縱酒一遇賊盡為所殲群賊沿途殺人由安德鳳臺夾岡各門外鄉落搶掠趨秣陵閱時應天府推官羅節卿指揮徐承宗率兵千人守閔望風奔潰賊遂過閔而去○八月虜寇古北喜峯諸口總督薊遼

侍郎王忬徵兵拒走之時忬至薊鎮未幾虜酋打來孫黃台吉擁眾數萬薄古北喜峯諸口忬即徵兵拒之虜遂退走忬因大集將佐計戰守諸利害于是條上八事曰列戍守聽稚駐據險要專責成明偵報張兵聲恤主兵撫屬夷俱報可忬乃以副總兵吳佩遼東總兵殷尚質薊遼總兵周益昌副總兵龔業及總兵趙卿李賢等各統騎步諸兵分守冷口馬蘭峪墻子石塘嶺及渤海子紫荆倒馬諸關隘自以精兵居中應援又約宣大總督許論各移兵就險勿分彼我界所以為防禦計者殆無不至○詔立擒叛人王直等賞格時南京御史金澍陶承學各言中國叛人王直久住日本主謀煽禍乞懸立擒捕賞格兵部議覆賞格宜如宣大例有能擒斬王直來獻者封以伯爵賞銀萬兩授坐營坐府職銜其斬獲酋黨者各賞有差○詔進原任主事史際尚寶寺卿與四品服色時際輸米五千石助軍餉故有是命○巡撫直隸都御史曹邦輔

檄兵擊潁野關倭賊殲之初賊自南京出秣陵關流劫溧水溧陽趨宜興無錫至潁野關邦輔慮與柘林賊合且為大患乃親督兵備王崇古會集各部兵扼其東路四面感之隨地與戰乃檄召僉事董邦政指揮婁宇以沙兵助勦一戰斬首十九級賊始懼奔吳舍欲潛走太湖我兵覺之追及於楊家橋盡殲其衆此賊自紹興高埠奔竄不過六七十人流劫抗嚴徽寧太平至犯南都經行數千里戰傷無慮四五百人歷八十餘日始滅邦輔以捷聞歸功僉事董邦政時督察趙文華聞此寇且滅急趨赴之欲攘其功比奏則邦輔已先奏捷文華大怒遂思所以陷邦輔矣○九月巡撫浙江都御史胡宗憲與直隸巡撫曹邦輔會兵進勦陶宅倭寇師潰時督察趙文華以蘇寇之捷已不得與為恨見調兵四集謂陶賊寇乃柘林餘孽可取宗憲因大言賊不足平以悅其意遂悉簡浙兵得四千人約邦輔以直兵會勦浙兵分三道且兵分四道東

西並進賊悉銳衝浙兵諸營皆潰損失軍士千餘人直兵亦陷賊伏中死者二百餘人賊勢益熾文華先恨邦輔至是乃以陶賊寇患委罪邦輔及僉事董邦政叅之詔下邦政于總督逮問既而刑科給事中孫濬言近見督察趙文華請罷巡撫曹邦輔叅稱約與夾攻而邦輔後期及考疏內所列邦輔督副總兵俞大猷進勦在九月十一日浙兵次日方進則後期之罪不在直兵今蘇松士民交口咸稱邦輔實心任事而前流劫留都之倭又為邦輔所滅功能顯然遽請罷斥文華之意殆不可曉兵科給事中張栻復言浙直官兵會勦陶宅倭寇屢遭陷敗諸臣奏報不實且趙文華欺罔大負簡命上乃申飭文華矢心秉公視師圖效○諭選女子入宮時諭禮部選民間女子十歲以下者一百六十人○以灾傷免陝西西安等八府府州縣正官朝覲○兵科給事中楊允繩疏陳禦倭之策言州等七府府州縣正官朝覲○兵科給事中楊允繩疏陳禦倭之策言

海寇為患已及三載破邑殺官猖獗日甚而迄無底定之期者在將習不振而弊源不革夫為將之道曰制曰法曰謀江南諸將全不知此故用兵之際絕無紀律不鳴金鼓不別旗幟聚如兒戲渙若搏沙前有伏而不見後有賊而不知浸率為兵浪與賊戰自相蹂踐全軍覆沒此其咎端在不知三者而至于不設哨探不知地形又其取敗之尤當事者不此之察動以增兵益餉為請意不過張賊聲勢緩已罪愆豈知雖括天下之財供江南之役籍天下之民為江南之兵如以蛾赴火以雪實井竟有何益臣愚以為在先擇將而至于弊源則又不專在外督撫賂在京權要官司又賂督撫皆取具于民即今子遺待盡之民豈堪培尅侵剝之患異日國家隱憂蓋不止海島之間宜勅令大臣洗心滌慮剖絕朋昵之私汎掃苞苴之習此端本澄源平倭之要道也疏入納之諱按吳司訓瑞登曰當時嚴嵩父子以貨賄多寡為黜陟而又用趙

文華以視師江浙之吏悉歛脂膏以填溪壑當此外寇方熾之時而又有內寇以腹削之根本重地安所支哉吾以為允繩之疏更有關於宗社者不小也

詔留巡按蘇松常鎮御史周如斗再歷一年從其士民請也○詔勅令南京兵部尚書張時徹侍郎陳洙致仕奪守備撫寧侯朱岳俸二月以倭犯京城故也○以水灾免鳳陽淮安揚州三府及徐滁二州各衛所秋糧有差○虜犯宣大山西等處時糾衆數萬大舉入寇分犯宣大山西俄而山西虜自平陽方口出總督兵遮擊于朔州頗有斬獲虜遂非由王茂山遯宣府虜亦由瓦窯口引去○以蝗灾免山東濟南東昌青州等府秋糧有差○詔復魏國公徐鵬舉克班首如故初南京歲時百官朝賀以鵬舉為班首致詞及鵬舉罷守備撫寧侯朱岳代之輒據班首位鵬舉疏請於朝部言鵬舉元勳世臣爵列上公革任未嘗革爵况

係欽定班首且今奉祀孝陵先後之序較然甚明請如所奏報可○虜
寇懷來川總督王忬督兵擊走之詔進忬官任一子千戶時虜酋把都
兒打來孫等悉眾屯懷來川攻南塘兒墻黑衝峪大石溝諸處忬督兵
拒擊復走之事聞進忬右都御史兼兵部左侍郎仍任一子千戶併錄
宣大功加總督許論太子太保餘有差○冬十月裕王第一子生群臣
具疏稱賀○詔逮繫昌平知州衛鈿詣京訊治掌太常寺徐可成言寺
丞王守一祀長陵至昌平鈿不備鼓樂夫役送迎香帛亭又責械其樂
舞生非朝廷重陵寢之意 上怒故有是命○以旱灾減免山西太原
等府稅糧有差○詔殺直隸浙福總督尚書張經巡撫浙江都御史李
天寵及兵部員外郎楊繼盛于西市初繼盛獄具至冬月朝審三木詣
審諸內臣士庶夾道擁視因共指曰此天下義士又指其三木竊嘆曰
奈何不以此囊嵩與世蕃繼盛口吟曰風吹枷鎖滿城香簇簇爭看員

外郎豈願同聲稱義士可憐長板見君王聖明厚德如天地廷尉稱平
過漢唐性僻立來歸視死此身原自不隨楊 上英斷神睿繼盛雖論
死心實器之每讞繼盛輒執筆躊躇者久之卒不忍殺惟邊防軍務失
律者必殺不貸嵩揣知 上意乃以張經李天寵疏覆奏而附繼盛于
尾 上覽之怒江南釀寇遂下旨行刑繼盛妻張氏上言臣夫諫阻馬
市預伐仇鸞逆謀聖旨薄誥旋以鸞敗首賜湔雪一歲四遷臣夫啣恩
圖報誤聞市井之言尚徇書生之見荷上不即加戮俾從吏議杖後入
獄割肉二斤斷筋二條日夜籠櫃備諸苦楚年荒家貧臣紡績供給兩
次奏讞俱蒙特宥今歲混入張經疏尾奉旨處決倘以罪在不赦乞將
臣梟首以代夫命夫生一日必能執戈矛禦魑魅以報陛下奏入為嵩
所抑不得達遂與張經李天寵同死西市是歲論大辟囚當刑者凡百
有餘人詔決九人而經天寵繼盛三人與馬由是天下惡嵩父子及文

華益甚

謹按吳司訓瑞登曰士師天下之平西市臣民之聚即使一人無辜受戮亦干陰陽之和名夷狄之變况張經嘉興之捷為第一功楊繼盛劾嵩之疏為第一忠即李天寵之在浙亦不過飲酒廢事何嘗失律喪師特為趙文華輩誣陷一旦遂致之死况當刑者百人而所夾者九人三良與焉豈非天下人心之共憤乎是時何鰲掌刑罪可勝誅哉噫習此忍心甘為故入至于楊允繩疏論侵冒而反曲律處絞宜天灾地裂史不絕書也

又按楊忠愍臨刑詩曰浩氣還太虛丹心照千古平生未報恩留作忠魂補天下相與傳誦先是忠愍在武選嘗獨居深念至夜分夫人張問其故曰吾受上恩思有以報耳張曰嚴相國方用事豈君直言時耶忠愍不應遂沐浴具疏上在獄時有一吏應生頗為周旋尚書

屢禁之不為動又欲自具章申救忠愍曰歲予血三年而碧者即地下必有以報應生及遇害時王世貞吳國倫徐中行王世懋等執手泣訣經紀其喪而王遴以女許配其次子應箕全其後事尤人所難支進士大綸曰嚴嵩內結貴璫外布黨與既滅邦憲復逆天道公殺諫臣自是而沈鍊郭希顏繼殞矣即閹門寸斬不足以洩義士之憤也

南京兵部尚書潘潢卒潢婺源人有文學行誼修飭士論重之○十一月壬辰朔日食○以提督南京操江都御史史褒善為南京大理寺卿尋還原職時褒善遷大理兵科給事中楊魏上言東南倭夷方熾叅贊巡撫俱以失事黜褒善幸脫罪譴乃得美遷以釋重負因循規避若此寇患何時已乎乞還褒善原職仍併將銓部罰治 上是魏言令褒善仍督操江奪選卽俸一月吏部尚書李默等姑貸之○詔定甲役舖戶

事宜初巡城御史黃正色素革夫役八事掌錦衣衛事陸炳亦請處舖戶均甲後革舖長以恤民窮俱下都察院會官集議至是條上八事一均甲役言足優免之則二處舖戶言酌貧富之宜三革舖長言止宜總甲之役四均舖舍言齊人戶之數五省卯酉言止水火盜賊之報六革夫役言私役不許槩撥七均雜役言不得科歛器用之類八禁豪橫言治玩法生事之民議上俱允行之○遣使送歸琉球就學官生先是琉球國中山王尚清遣官生蔡朝用等五名就學南京國子監至是在監五年請歸國省親聽用許之遣使送歸○虜入遼東大掠義州諸處時虜酋打來孫等擁衆入遼東塞殺掠義州諸處居民總督王忬復拒擊走之巡按御史上言地方被殘宜懲究總兵官殷尚寶罷免巡撫都御史蘇志皋并切責總督王忬章下兵部尚書楊博覆言尚質等力能卻虜情有可原上從之置不問○詔止徵狼兵是時調至客兵多恣暴

肆不奉約束川兵與山東兵聞忬將尚允紹幾為所殺至於出戰皆自為進退自酉陽兵為倭所敗即大譟奪舟徑歸蘇州田州瓦氏等至浙多驕悍所過殘掠居民迄無戰功可錄于是總督侍郎楊宜上言徵調狼兵非徒無益而肆意騷動殘害百姓請罷之 上從宜言命兩廣督

臣查果遣發隨路掣止○詔右都督朱希孝左都督陸炳各任一子錦衣千戶嚴鵠官校戴經李恩各進一級時希孝奏言鵠執獲虜謀哈台白馬廝二人炳奏言經恩執獲虜謀波羅花鬼羊羔二三人皆我華人易名為虜用者兵部尚書楊博議覆 上命希孝炳各任一子錦衣百戶嚴鵠等照烈陞級鵠嵩之孫經恩皆炳家丁也○閏十一月光祿寺卿章煥疏陳禦倭之策條上八事一曰統兵之制未定言將佐雜居諸軍烏合兵視將如弁髦將視郡縣如傳舍必將有專閫兵有常伍無事相習有事相隨則兵可統二曰馭兵之制未定言諸軍目不睹軍容耳

不聞將令有急驅之不能卒集臨陣而逃轉相掠劫必平時有約束臨陣有紀律則兵可馭三曰調兵之制未定言調至土狼獾得難訓必以諸邊節制之兵為準調到土狼之兵為輔則調可用四曰募兵之制未定言分道募兵皆游手無賴來去不定道路驛騷必程其技力籍其家室守法者厚恤犯法而逃者孥戮則兵可募五曰練兵之制未定言始調客兵不練鄉兵既用鄉兵又散客兵及鄉兵難持不免復徵客兵不惟緩不及事且恐為客兵所侮必識權宜實用則兵可練六曰屯兵之制未定言兵有營居故可聚不可散有行列故可散不可亂今雜處市廛嬉遊里巷遂令山東椎鈍變為純袴狼苗鄙野咸習歌舞必營居行列早為區處則兵可屯七曰行兵之制未定言南方皆沮洳之澤桂葦之場動犯兵家所忌必行有斥堠止有堅壁又有戰地有間諜則可正可奇可疑可伏而兵可行八曰養兵之制未定言師行糧從強者主戰

弱者主變今或臨陣未食或食至不均或師行境外食具城中必給軍有制犒士有資弔死扶傷恤孤問寡則可飽可饑可生可死而兵可養又言倭賊遠來多苦於饑海濱積藏賊據而食所向無前如使築城繕堡蓄積收歛野無所掠又坐困之道也部覆疏切時務請下督撫議處行之○詔杖御史魯佩發戍邊衛初佩刷卷南京事竣繳冊有奏啟二本上責問啟本為何佩以舊制對奏啟自東宮薨後非一二年淺近差錯此必有說鎮撫司嚴訊以聞下法司擬罪坐佩違制宜黜為民上令重擬改戍邊衛詔可仍杖而遣之○詔別防倭諸臣職守給事中孫潛上言防倭諸臣既有巡撫總兵又有總督及督察重臣事權不一牽制靡定所以迄無成功議下兵部尚書楊博覆言諸臣職守督察主竭忠討寇覈實布聞總督主徵集官兵指授方畧巡撫主督理軍務措置糧餉總兵主設法教練身親戰陣至于有司責在保安地方固守城

隍 上然之命行諸臣各加遵守○十二月詔名南京新設軍營為振武營初用兵部議選南京各衛餘丁補正軍三千以都督段堂領之使防守京城又選孝陵衛餘丁三千人以豐潤伯曹松領之使供護陵寢各赴營場團練南京兵部尚書張鏊復言福建都指揮黃鎮四川寧州衛指揮劉顯江西贛州衛指揮謝朝三人勇畧素聞可徵赴留都教練軍士報可○命戶部遣官往四川山東諸處取礦銀○詔逮繫給事中楊允繩于獄訊治論死時允繩與御史張巽言巡視光祿錢穀疏論寺丞胡膏混報子鵝偽增物價乾沒帑銀宜正侵冒之罪膏上疏辯訐言玄典隆重所用品物不敢徒取之數允繩憎臣揀選太精斥言不過齋事之用取具可耳何必精擇訕防皇上齋祀靡費駕言劾臣苟有臣子之心安敢如是皇上為國為民 相誠格天臣有欺謗如允繩者何以為百官勸臣一身不足惜如朝廷 八体何 上大怒詔錦衣逮治付刑部

論罪尚書何鰲坐允繩誹君比子罵父律論絞 上令仍同巽言廷杖八十繫獄待決巽言及膏俱謫補外○召督察侍郎趙文華還京先是文華攘王江涇之捷為已有又奏言督兵破倭于周浦等處捷聞召之還京時各臣奏勘功罪俱明獨僉事董邦政指揮婁宇二人文華惡之賞竟不及巡按直隸御史張雲路徐敷亦為論奏不報○吏科給事中王鶴請禁治監司之奔競守令之驕橫者上言今天下奔競者莫甚于方面而驕橫者莫甚於進士之有司撫按一到或陞代節且兩司紛紛謁賀往來道路無有寧時廩給夫馬重困里甲近以地方多事奏請多選進士充守令初至則飾欺矯情冀監司薦揚既得薦揚貪酷並作乞勅令該部痛懲前弊一體罷黜疏下部議行之○山西陝西河南同時地震時陝西地震聲如雷鷄犬鳴吠山移數里平地折裂水溢出西安鳳翔慶陽諸府州縣城皆陷沒官吏軍民壓死者數十萬時原任兵部

尚書韓邦奇光祿卿馬理祭酒王維禎同日皆死連震數月人心惶懼
夜皆露宿不敢近廬舍山西平陽蒲州河南河洛諸郡縣皆震○外馬
房草場火○兵部尚書楊守禮卒守禮蒲州人爽朗有大度不為世俗
態不猷敏達所至著有聲績○晦日日無光時日光忽暗青黑紫色日
影如盤數十相摩視久則百千飛盪滿天向西北而散易通卦驗云愚
智同位日月無光

丙辰嘉靖三十五年

春正月辛酉朔上不御殿○寧夏地震有聲○賜黔國公沐朝弼勅
令其節制土漢諸軍撫按官不得擅調諸司白事及移文謁見禮儀俱
先鎮守後撫按違者以名聞初朝弼自都督襲封又以先事被勘有司
薄之稍奪之事權至是援父祖例請許之○兵部尚書楊博以憂去召
總督宣大兵部尚書許論還部管事○庚辰彗星見時彗出進賢星旁

芒長尺西南指漸長至三尺餘歷掃太微垣次相星又東北行入紫微
垣掃天床星至四月二日始滅○二月會試天下貢士命大學士李本
少詹事尹基為考試官取金達等三百人○命戶部侍郎鄒守愚往陝
西等處祭告境內各山大川河洛之神及祀典所載神祇以地震之變
故也○詔罷直隸浙福總督侍郎楊宜時趙文華與巡撫浙江胡宗憲
私厚亟欲以宗憲易宜文華正月中入京上諭大學士嚴嵩問文華
南寇始末文華即冒言寇起時苦無兵今兵集苦督撫非人不能調度
請以宗憲代宜故特詔罷之○詔逮繫吏部尚書李默于獄訊治論死
初默復入吏部益有苞苴聲給事中梁孟龍論劾默剛褊貪污以名器
為罔利之媒不宜久縱以傷國體默上疏訐辯上兩舍之不問默初
資緣大學士嚴嵩進用及典武試取陸炳為門下士炳得勢內援默日
見信嚮默遂與嵩異嵩啣之趙文華自江南視師旋凌侮公卿無敢抗

者默獨以盛氣折之揚宜既罷嵩與文華欲用胡宗憲而默復請用王
誥由是惡默益甚文華遂摘默部試選人策問中漢武征伐四夷而海
內虛耗唐憲功成淮蔡而晚節不終諸語指為謗訕劾之 上大怒下
禮部參看尚書王用賓等覆言默偏執自用失大臣體而策問所引尤
不宜言 上以其黨護切責用賓等下默錦衣拷訊法司論罪刑部尚
書何鰲遂坐默比子罵父者律絞 上曰律不言臣罵君古所無也今
有之其加等處斬默竟死獄中

謹按夫進士大論曰李默博雅有才負氣好以愛憎軒輊人在銓部
大通賄賂及文華以策問構獄則近於反唇腹誅之法矣故人遂惜
默而罪文華

以胡宗憲為兵部侍郎總督直隸浙福軍務○詔逮繫直隸巡撫曹邦
輔詣京訊治遂謫戍邊趙文華陷之也○三月以大學士李本攝吏部
事本攝吏部欲第九卿長貳及寺院督府諸大臣材品奏請去留乃上
言大臣者小臣之倡也大臣不職則小臣靡然從之故去不肖者先大
臣于是疏列諸臣百十有三人別為三等其上二十有八人首工部尚
書吳鵬次趙文華嚴世蕃陸燿馮天馭何鰲沈坤諸人其中七十人則
鄔懋卿徐履祥趙貞吉諸人其下十有五人宜斥免南京吏部尚書楊
行中禮部尚書葛守禮及艾守淳郭馨陳邦修等多可大用者時論非
之又考察不職科道官共三十人不謹都給事中卹從善等不及都給
事中王鳴臣等皆罷黜降調如例御史留用者仍各杖四十是時大學
士嚴嵩欲鋤排異已以懾衆志故本一切屏斥公論益為不平○顯陵
後恩等殿成訖工詔加提督侍郎盧勳俸一級廕一子國子生其董役
諸官各擢賞有差○詔誅降虜人王青等三十二人初虜入山西生得
漢人輒降之啗以厚賞令詐為口外饑民行乞入邊偵我虛實故虜入

數得利去至是虜酋俺答謀犯邊先遣降人王青等入偵而按兵威寧海子待之會青等三十二人俱為山西三關邏卒所縛巡撫王崇古上言狀詔盡誅青等賞崇古等銀幣有差○以工部尚書吳鵬為吏部尚書時吏部缺會推吳鵬鄭曉王用賓請上曰曉譽望不聞用賓貪汚素著鵬亦少風力既而後疏推鵬雖少風力但志圖報效任之必能盡職上乃命鵬○廷試賜諸大綬陶大臨金達等進士及第出身有差○加大學士李本少保武英殿大學士以考察九卿堂官及科道事竣故也○擢工部侍郎趙文華為工部尚書時吏部會推文華補工部上悅其得人遂擢用之○夏四月改南京吏部尚書鄭曉為右都御史兼兵部右侍郎協理戎政改禮部尚書王用賓為南京吏部尚書○詔逮戶部郎中金九齡法司訊治黜為民坐廷試時私人入禁門為衛士所執故也○擢吏部左侍郎吳山為禮部尚書兼翰林學士○倭寇犯

温州同知黃釗死之詔贈浙江叅議廕一子立祠時寇薄溫城釗馳檄出兵迎擊戰敗被執賊欲索千金為贖釗罵賊不置賊怒遂磔殺之事聞贈官廕祀○倭犯崇德遊擊將軍宗禮戰于皂林死殺自乍浦入欲犯杭州禮以數百卒守崇德乃逆戰于皂林分左右翼夾擊之賊首徐海等皆辟易獲七十餘級力竭無援大呼鎮撫侯槐何衛義官霍貫道等力戰俱陷陣死事聞詔贈禮都督廕子世襲指揮僉事槐衛亦贈加二級貫道贈光祿寺丞廕一子知印○總督胡宗憲奏遣寧波府生員蔣洲陳可願使倭願還言至五島遇王直等言日本國亂王相俱死諸島夷不相統攝須徧諭之乃可我輩昔坐通番禁嚴以窮自絕誠令中國貸前罪得通貢市願殺賊自効宗憲以聞下兵部集議不可乃止○詔建靈雨謝典先是上諭禮部曰春夏交而雨澤少四多災皆係氣數未有人能叩上玄者勿謂不經理宜敬奉其傳刑止屠仍告六宮廟

未幾雨降 上悅大學士嚴嵩等率百官表賀建謝典三日 甘肅天
鼓鳴○倭寇犯鎮江瓜洲儀真等處○戶部左侍郎鄒守愚率守愚奉
詔陝西祭告賑恤還至河南病卒詔賜葬祭告贈右都御史謚襄惠
一子國子生○夏五月壬戌木星逆行犯房宿北第一星○命太子太
保工部尚書趙文華兼右副都御史總督浙福直隸軍務初倭逼會省
守臣闔門奔郊關之民提學阮鶚手劍開武林門納之且百萬倭不能
犯故超拜巡撫時宗憲欲撫賊文華黨之嚴世蕃庇焉鶚抗議主勦遂
共啣鶚鶚未至倭剽乍浦宗憲遽委代予羸兵千鶚卷甲突其圍敗
之又追擊之嘉興臨平山又敗之皂林賊遂集圍桐鄉鶚夜馳入保環
攻之百法不能下宗憲遣紅牌令講成鶚發礮碎之五書蠟出責宗憲
甚厲御史趙孔昭疏乞援宗憲音不發死守月餘徐海中銳彈窮乃遣
沈庄鶚遂進薄之巡江御史邵惟忠言倭寇通州攻圍未解餘自狼山

轉掠瀕江諸郡縣而瓜儀為留都門戶鎮常乃漕運咽喉不可視為緩
圖宜大集客兵嚴勅諸臣協心戮力共靖其亂兵部議覆言倭自入犯
以來未有徧浙之東西江之南北如今日者縱使地方多兵而分投防
禦不無顧此失彼之患徵兵應援實不容已日者趙孔昭乞援已議令
徵集湖廣土舍永順夷兵併山東河南廣東打手毛葫蘆等兵共六枝
俱赴浙直軍門聽用今再議選河南睢陳山東八衛陝西延綏及徐沛
募兵然徵調雖多事權貴一請勅遣才望大臣一人總督前去以為掎
角保障留都 上然之時工部尚書趙文華請行乃命兼副都御史以
往先是文華視師回言殘寇無幾旋當清蕩及倭患愈甚羽書屢至
上詰文華大學士嚴嵩亦知 上覺文華欺罔乃令文華復請視師故
有是命○冀州高邑新河栢鄉隆平及廣平等處地一日三震如雷○
勅建真武殿於齊雲山○辛午金星晝見○遣制勅房辦事左通政王

槐錦衣千戶仝天爵同內使一人採礦取銀於薊州王旺峪先是有詔採礦禮部議遣司官一人往既行上曰天地之寶不可不重命召還原遣官而以槐等代之○命兩廣河南湖廣等處歲進葛布時上諭內閣朕近取葛布於內司皆無見貯者惟祖宗時左右進御則有之夫葛之為服見於經亦為可用其令工部議奏工部覆言禹貢載豫州厥貢絲枲是貢葛自虞夏已然矣今四方產葛之所惟兩廣河南湖廣可備上用但一時難卒辦宜先於京城樵鬻其每年供用者乞下所司定織獻之得旨每年進入百疋○以翰林侍講邢一鳳為南京太常少卿○六月詔罷提督操江都御史史褒善初褒善駐蕪湖聞浙西倭寇突至即馳往徽寧避之賊渡江陰過狼山直抵瓜州至揚州無能禦者給事中張師載論劾褒善異煥失職上令罷之○廣東倭寇劫掠潮州等處巡撫都御史談愷以聞因請以本省兵船赴浙直軍門者掣還自

救部言並海諸省俱係要地宜令愷與胡宗憲酌議彼中事勢緩急以為去留不得自分彼此從之○倭寇入慈谿知縣柳東伯亡去詔令削籍初王忬在浙令兩浙諸縣皆築城自固獨慈谿士人持不可至是倭衆大至東伯不知所禦携印組走匿寇殘殺人民無筭縉紳被禍尤慘始追悔不城為失計東伯失守當坐死以無城可守削籍為民○慈谿省祭官杜槐等追擊倭賊死之詔贈官廕祀初倭入慈谿槐與父文明率兵追敗於王家團海道劉起宗因委防守餘姚慈谿定海三縣未幾與賊遇於白沙一日戰十三合殺賊三十餘人斬其一酋槐數被創遂墜馬死文明別將兵擊賊於鳴鶴塲斬白眉倭帥一級從七級生擒二賊上驚道呼為杜將軍既而復追賊至奉化楓樹嶺以兵少無繼陷陣沒巡按趙孔昭以其事聞詔贈槐光祿寺丞文明府經歷廕子國子生有司立祠祀之○大學士嚴嵩乞休不允時嵩一品九年再滿上疏辭

位且言國家考課舊典群臣歷俸九年者例不引奏復職况臣忝居廷臣之首再歷九載無尺寸之功以年以例俱當引避 上賜勅獎諭慰留之○秋七月詔授帶俸太子太保禮部尚書顧可學光祿大夫柱國廕一子國子生以六年秩滿也○制勅房辦事左通政王槐進王旺峪礦銀三千兩并上中下礦砂各五斤○西苑獻瑞穀一莖雙穗者九十五本詔獻太廟群臣表賀○詔脩紫荊倒馬諸關隘以雨水衝圯故也○八月襲封衍聖公孔貞幹卒於京師賜葬祭如例其子尚賢請回籍終制許之○詔廢徽王載瑜為庶人自殺初王國開封鈞州先恭王箠殺知州巡按御史劾之 上謂御史私庇其屬逮詣京廷杖之及王即位謂帝庇我乃益橫日嗾護衛卒梭羅士民家腴美田園竒異木石輒占取之女子端麗者強昇入府為宮婢不可則以予衛卒小有過輒箠死或生啖虎豹或生蓋棺中燎焚死痛哭聲徹道又庇其伶人使凌轢

縉紳又挾諸客微行鳳陽留都又素好方術士煉女癸為鉛服之云能延筭時有梁散人以羽客出入王門下知 上好方術乃竊王鉛走京師黃緣獻 上服之 上喜復索鉛散人不能繼貽書求王王謂吾鉛當自獻何為假彼市寵也乃不與散人啣之一日 上從容問散人爾遊徽邸知王何似散人前卻奏曰日者猶未諳事自遊留都還則大曉暢 上愕然自是疑王而州民耿安有女在王宮被箠死燬其屍安痛女非命走京師上變告王謀不軌且指其潛窺留都鳳陽睥睨非望及諸罪狀下河南撫按勘覈不妄 上怒命削王爵廢為庶人禁錮鳳陽邸于是巡撫都御史潘恩等率眾圍王宮王懼命妃妾四十人俱麗粧自經王亦經死貨貨俱沒入官先是王庭鍾鼓自鳴後苑見群羊入沒占者知其為亡國兆云○ 詔有司採芝 上問禮部古用芝草入藥今產于何所求之可得否具以狀對尚書吳山等對言本草芝有赤白

青黑黃紫其色不同其味亦異然皆云久食輕身王充論衡云芝生于
土土氣和故芝草生瑞命記云王者德仁則芝草生文選云煌煌靈芝
一年三秀漢書儀云芝有九莖金色綠葉朱實夜有光黃帝內傳云王
母遣仙歌萬年長生之曲授帝以石函玉笈之書會閭風瑤池之上授
神芝圖十二卷然世不常有服食之法亦未有傳 皇上體道奉玄芝
草自將應時挺生遠近必有獻者所產之地臣未敢預擬于是 上詔
有司採諸玄嶽龍虎三茅齊雲及五嶽仍訪之民間會宛平縣民張臣
祐得芝五本獻之 上悅賜銀幣自是臣民獻芝者紛紛矣○詔諭總
督浙福直隸軍務尚書趙文華等協力勦賊初文華赴浙沿途檄徵河
間山東兵四千人募徐沛兵千人為前鋒及抵鎮江兵東下諸寇在常
州桃港諸處者聞之皆解散亡何復聚掠倏忽莫測胡宗憲議欲招輯
之阮鶚不可文華等益恨之巡按趙孔昭蘇州巡按周如斗是鶚議上

言寇未一挫撫之徒滋後患宜命文華等矢心討賊安民勿輕信寡謀
自貽僇辱 上然之諭文華等協謀勦寇尅期蕩平○官兵大破倭寇
於沈庄初海舍桐鄉賊黨別陷仙居巡撫阮鶚赴勦謀舉火城中分道
入應三戰賊皆敗遂殲之言者皆謂宜切責宗憲而專任鶚剿平 上
從其議曰言撫者斬於是賊辛五郎等奔蔡其山鶚趣兵大戰獲之黨
陳東麻葉輩以次授首海勢孤乃退保沈庄溝柵數重官兵皆觀望不
敢進鶚大怒曰若輩乃不如海之攻桐鄉耶檄趣總兵俞大猷先鶚觀
重兵由海鹽突環之戰寅至酉海斃賊之鶚所部兵自四月戰於觀海
又戰於海寧等處又戰於仙居又戰於白馬廟又戰於乍浦等處又戰
於蔡其至沈庄之戰腹裡賊乃盡是年六月也至十二月鶚與海道正
詢都司戚繼光攻舟山且拔宗憲兵乃至鶚堅主勦冒險犯猜以至成
功又建言善後卹死蠲賦撤客兵言撫者益甘心矣文華而上捷盡襲

為已功 上命械繫首惡至京正法既而兵部尚書許論等言首惡就擒地方底定皆皇上至誠昭格玄功允洽是以百靈助順謀者啟而戰者翼非區區人力所能強為乞上修祀用答玄貺趙文華等功次待覆實擢賞 上從之降勅旌功令促文華還京○錦衣衛千戶全天爵進礦銀三千五百兩 上諭內閣曰昨玉旺峪之寶似勝于初今可仰承天地之賜令如法取用不可自誤各處未開之場仍令查訪取用以顯金玉露形經旨太上玄風于是戶部上疏稱頌聖德因言帝錫嘉祉不當壅闕於無用之地請宜示大爵及四川山東河南各委官務實採取其未開之所仍行撫按按訪以稱天地降祥及聖主足國裕民之意報可○詔訪買龍涎香 上諭戶部龍涎香十餘年不進臣下欺息甚矣其備查所產之處具奏取用戶部請遣官馳至福建廣東會同原委官於沿海番舶可通之地多方訪買 期治罪 上仍令遣官雲南求之

時採芝採銀採香之命並下使者四出官司督取急於星火論者咸歸罪陶仲文顧可學云○九月詔許原籍為民駙馬都尉鄔景和留居京師景和籍崑山詣闕入賀聖誕因言臣自五世祖寄籍錦衣世居北方今被罪南徙不勝犬馬戀主之情扶伏入賀退而私省公主墳于西山見丘封翳然荆棘不剪臣竊自念孤死尚正首丘臣屬為生人託命貴主獨與死者魂魄相吊於數千里外不得展春秋祭掃之誠拊心傷悔五內崩裂臣之罪重不敢祈恩惟陛下幸哀故主使臣得寄籍原衛長與靈影相依死無所恨疏入 上憐而許之○杭州府大火自府城東南隅及郭外官民廬舍焚燬數千區死者不知其數○虜寇喜峯口虜酋小王子打來孫等寇一片石喜峯口諸處總督王忬督兵拒走之事聞詔賜金幣有差○火星犯太微垣上將星○命孔子六十五代孫尚賢襲封衍聖公○庚辰大風揚塵四塞○總督尚書趙文華至京初文

華再出督兵所至徵兵集餉靡費不貲于是提編徭役加徵稅租截留漕粟扣除京帑迫脅富民脫釋凶醜搜括公私金寶圖畫以百萬計其為軍旅之用止什之一二所徵官士民兵川湖廣貴山東山西河南北無不罹患而臨敵不前遣還不去往往潛為盜賊行者居者並受其禍雖有梁庄之捷何足贖之至是還京而吳越之間始若脫距○冬十月太醫院御醫李杲進玄嶽仙芝四十九本詔留御前賜杲絲幣○賜故黔國公沐融沐鞏祭葬融鞏皆朝輔子相繼歿殤禮部以既襲公爵請如例給卹典從之○金星晝見凡四日○湖貴苗復叛總督侍郎馮岳平之初張岳既去諸苗盧阿頃等復叛馮岳至檄總兵石邦憲復擊平之事聞進岳右都御史無侍郎邦憲都督同知餘皆擢賞有差○十一月朝鮮遣使歸俘先是倭舡四艘自浙直敗還飄泊至朝鮮境朝鮮國王李恒遣兵逆擊于海中盡其之得中國被擄并助逆者三十餘人至

是因遣陪臣沈通源等入賀以聞并歸我俘 上嘉其忠順賚銀幣仍賜璽書褒獎通源及獲功人李潤慶等皆厚賜遣歸○虜犯遼東塞總兵官殷尚質遊擊將軍閻懋官禦虜死之時虜衆十餘萬入寇鎮靜堡諸處尚質等帥兵出禦力屈一死之事聞詔加贈卹奪總督王忬俸巡撫蘇志皋落職○賜大學士嚴嵩高免朝仍腰輿入直 上諭元輔嵩年踰七袞賜免廷賀唯入直西苑仍賜腰輿先是賜乘馬入禁至是復加恩寵為異數云○獻倭俘舉謝玄大典詔論平倭功時倭俘麻葉陳東等俱械繫至兵部尚書許論等奏請獻俘從之群臣俱具服稱賀仍舉謝玄大典論平倭功加趙文華少保胡宗憲右都御史各任一子錦衣千戶餘陞賞有差○總督胡宗憲督總兵俞大猷帥師攻舟山倭平之初自梁庄捷後倭賊悉靖惟舟山倭據險結巢官兵環守之不能克時土狼兵俱已遣歸而川貴兵六千人始至胡宗憲方留防春汛隸總兵俞

大猷經營舟山之賊會夜大雪大猷乃督兵四面攻之賊悉銳出敵殺
土官莫翁送諸軍益怒競進賊大敗歸巢官兵積薪草以棕葉捲火擲
之賊四散潰出斬首一百四十餘級餘悉焚死賊遂平○戶部主事沈
應乾進河南縣等洞礦銀一千兩并礦石礦砂各二壘○廣東官軍討
峒賊陳以明等平之初廣東新寧會新與恩平之間皆高山叢箐徑道
多及奸惡亡命輒竄入諸徭中吏不得捕遂聚至萬人推以明為主號
承天霸王流劫陽江諸處官軍討之數敗督撫侍郎談愷等乃檄諸路
土目兵進勦破之斬其驍將偽飛虎將軍伍廷章等乘勝攻賊各巢俱
平之事聞詔廕愷一子國子生餘賞有差○廣東布政司進龍涎香一
十七兩○十二月鎮江府地震○山東官兵討劇賊楊思仁等平之思
仁青州益都縣民善騎射輕財好施鄉里呼為賽宋江先坐事為怨家
所告縣官捕之急思仁遂聚眾謀夜襲府城事泄不果因流劫樂昌諸
城莒州等處諸亡命惡少歸之眾三百餘人至是撫按官檄海道副使
關大年等督兵勦之思仁懼遂變姓名潛走會其黨為官軍所獲乃言
思仁所在因佯執之餘黨皆散事聞詔斬思仁等二十二人于市進大
年俸一級仍賜金幣餘賞有差○刑部尚書何鰲引疾乞休許之召起
丁憂服闋工部尚書歐陽必進為刑部尚書○詔加贈故江西副使許
達三代誥命時達已加贈禮部尚書子錦衣指揮許瑒復以祖父母誥
命請 上念達精忠勁節特允之○提督操江都御史高建言狼福二
山乃倭寇出入之處請增募水兵萬人沙船三百艘分發叅將等官操
練部議從之

卷之六

五十七

九卷外



